

# *SIBAKA SESIKETILWE KI*

## *MULIMU SA KULAPELELA*

 Halu yemeñi ona cwalo fa nako nyana halunze lu inamisa litoho za luna kwa tapelo. Mi cwale, ni litoho za luna ze inami, mi Ni sepa kuli ni lipilu li inami, ni zona, Hani zibi kana ki babakai mwahali mo baba ka tabela ku hupulwa mwa tapelo, ka sesiñwi sa butokwa? Mu nanule fela lizoho la mina, muli, "Mulimu, uni fe busihu bo se Ni kupa." Mulena ami fuyole.

<sup>2</sup> Ndata luna Ya kwa Lihalimu, cwale ha nze lu atumela Lubona lolutuna lwa muhau, ka tumelo, lu kena mwa sibaka sa Mwa buse; ili koo Mulimu, ni Mangeloi, ni Makerubimi, ni libupiwa zeñwi za Lihalimu li kopani hamoho. Kakuli Na bulezi kuli mane hakukonali kuli nihaiba nyunywani iliñwi iwelefafasi kusina kuli Ndate wa Lihalimu azibe ka yona. Ku cwani he kanti fa Ha bona litoho za sicaba sa hae ha siinami, ni kubiza ku Wena kwa likupo za butokwa. Ndate, talimafafasi fa kutokwa kwalifasi busihu bo, kakuli lu sicaba se si tokwile.

<sup>3</sup> Mi Na lapela, Mulimu, kuli kakuli lu kopani mo ni ku bonahalisa ku Wena tumelo ya luna ku Mulimu ya pila Ya alaba litapelo; lu zwile mwa lifasi le li sika kena mwa mupato, wa pilu ni lizebe, luzwile kuil lu pile bupilo bo bu kauhani, ni kupila mwa buipulelo bwa tumelo ya luna ku Wena. Busihu bo lu nanuzi mazoho a luna, ni kubulela kuli, "Lu tokwile." Mulimu Yomunde, alaba yeñwi ni yeñwi ya likupo za bona.

<sup>4</sup> Mi cwale, Ndate, lu lapela kuli U lupotele busihu bo mwa Linzwi. Lu tahanga kwanu kwa sikuluho, kwa kutwisiso, kuli lukone kuziba mwa ku pilela mwa lizazi la kacenu le; ze luswanezi kulibelela, za kueza. Kakuli, lu ziba kuli Kutaha kwa Mulena ku sutelezi, kuya ka lisupo kaufela zene ba bulezi bapolofita kale kale. Lu sutelezi nako, Mulena, fo ku ka kalela piliso yetezi kwa bana ba Hao. Mulimu, lumeleza kuli, mañi ni mañi, abe teni, Ndate. Kusike kwaba nihaiba yomukana ya tondahala. Wani kona mulelo wa luna wa kuba mo, Mulena. Lwa Ku lata, mi lu lika ku itukiseza hola yani.

<sup>5</sup> Ambola ku luna, lwa kupa hape, busihu bo. Mi ufolise bakuli. Bakuli kaufela ni baba imezwi baba li mwa muyaho wo, lu lapela kuli Uba folise, Mulena; mi sihulu bani babana ni kutokwa mwa moyo. Lu lapela kuli U pilise moyo kaufela o latehile. Taza mulumeli kaufela ka Moya o Kenile. Mi uncafase kutiya ni Mata mwa bana ba Hao baba lumela. Lumeleza lika ze, Ndate. Lu kupa zeñata, kakuli Ulu bulelezi kuli lu kupe cwana, "mukupe

ka buñata, mukupe lika zetuna, mwa buñata bwa zona,” kuli tabo ya luna itale. Mi lu li kupa ka Libizo la Jesu Kreste. Amen.

Mwakona kuina.

<sup>6</sup> Ni talima taba ye kuba tohonolo yetuna busihu bo, fa ku kuta kwanu kwa pata hape, kwanu mwa sikolo se si pahami se, ku to talimana ni sicaba sesinde se si kopanezi kwanu ku to utwa Evangel. Ni kupa sishemo sa Mulimu ku ni tusa ku mi bulelala Niti kuya ka mo Ni zibela Niti yateni. U sa kona ku kwala mulomo wa mutu, ona mwa Na kwalezi mulomo wa tau. Mi hane Ni ka lika kubulela sika se si fosahalile ni ku shutana kwa tato ya Hae, tapelo ya ka ye sepañala ki kuli Akwale mulomo wa ka, kuli Ni sike na si bulela. Kakuli, luli, Ni bata kuba mwa Lihalimu, na kasibili; mi Ne ni si ke naba kwani, mi, kwanda zeo kaufela, Ne ni kaba mueteleli wa lihata, mutu yana ezize sesi buhata. Haiba Ni eza cwalo, kakuli Hani zibi shutano ni yekana. Mulena ami fuyole.

<sup>7</sup> Cwale, kamuso kakusasana, haiba iba tato ya Mulimu, Ni bata ku bulela fa tuto yani, *Linyalo Ni Telekano*. Mi lu sepa kuli mu ka taha, mi mutahe ni lipotoloto za mina ni mapampili. Haluna ku liyeha hahulu, kono Ni tabela fela kuli... Wo nelí mulelo waka wa kukutela kwanu, pili, mwa Indiana, kakuli ne Ni mi sepisize seo. Mi Ni ka lika, kamuso kakusasana. Haiba Ni palelwa ku itisa kamuso kakusasana, Ni ka ikutaza kamuso busihu. Kono Ni ka lika kamuso kakusasana, haiba Mulena a lata, ku bulela fa tuto, mihupulo yemibeli. Mi Mulimu a lutuse ku ziba se sili Niti, kuziba fela seo Niti ili sona, kuli lu zamaye mwa Niti ni mwa Liseli. Luna...

<sup>8</sup> Mwa ziba, ne ni banga ni mulikani yomunsu. Mi ani bulelala, ki hali, “Muzwale Billy,” ki hali, “Hani—Hani batí ku yo ba ni butata fa nuka.” Ki hali, “Ni bata kuba ni tikiti yaka mwa lizoho. Mi cwale pindo ha ilila, Hani lati butata ni bo bukana kwani. Ni kupile Mulena, nako ya kale kafo, haiba kuna ni se si fosahalile, ni lukela ku lukisa zeo ona fa,” ali, “kakuli ku ka yo unsufala ni liñungwa ka nako ya kakusasana yani fani sisepé ha si ka yo fuwekela kwa neku leliñwi.” Ali, “Hani lati ku yo lyanganisiwa mwa mufuta kaufela. Ni bata ku tokomela za teñi zani kaufela cwale.” Zeo kona ze lubezi mo, mulike ku tokomela ze lyanganisa kaufela, kuli lu yo zamaya ka bundume ka hola yani.

<sup>9</sup> Cwale, Hani buleli ku mina fa nako yetelele busihu bo, kakuli lukaba ni lisebelezo zepeli kamuso. Mi cwale Ni ka ya kusili, kwa sibaka sesiñwi, kusili, lisebelezo zeñata.

<sup>10</sup> Kono, cwale, mwa Buka ya Deuteronomia. Ni tabela kubala kuzwa mwa kauhanyo ya bu 16, litimana za makalelo zetalu, za Deuteronomia 16:1 kuya fa 3.

*U mamele kweli ya Abibi, ni kubuluka paseka...ya  
MULENA Mulimu wa hao:...mwa kweli ya (bune) kweli*

*ya Abibi ya ku zwisize MULENA Mulimu wa hao mwa naha ya—ya Egepita busihu.*

*U ka ezeza sitabelo sa paseka ya MULENA Mulimu wa hao, sa lingu ni sa likomu, mwa sibaka sa ka keta MULENA ku beya libizo la hae ku sona.*

<sup>11</sup> Cwale, tuto yaka busihu bo kikuli: *Sibaka Sesiketilwe Ki Mulimu Sa Kulapelela.*

Haiba mu lemuha, kweli ya A-b-a-d...-b ye liteni, italusa, "Lungu." Kweli ya Lungu kona fo ne ba lukuluhalnga.

Mi cwale taba ye nca ki ya kuli luna busihu bo, kakuba balapeli ba Mulimu, mwa lizazi le lu pila ku lona, mi lu fumana minahano ye miñata hahulu ya batu. Mi haibile fela kuba kuna ni mihupulo ye shutana ka sika, ku lukela kuba lipuzo ze shutana; ku swanela kuba kalabo iliñwi ya niti kwa puzo kaufela ye buziwa.

Hane Ni ka buza puzo ya kuli, "Ki sikamañi se?"

"Kihande," neba kali, "ki sipula."

"Ki sañi?" Mwabona?

<sup>12</sup> Cwale, kwani, yomuñwi na ka li, "Ha ki sipula. Ki limati." Kihande, ki limati, kono hape ki sipula. Mwa bona, ku swanezi kuba ni kalabo ya niti ku yona.

Mi hane Ni ka buza puzo ka sika kaufela, kuna ni kuba kalabo ya niti. Kwa kona kuba sesiñwi se si sutelezi bukaufi ku yona; kono ku lukela kuba kalabo, ya niti ye namile hande kwa puzo kaufela. Kacwalo, he, puzo kaufela ye taha mwa bupilo bwa luna, ku lukela kuba kalabo ya niti, ye lukile.

<sup>13</sup> Mi cwale, kacenu, lu utwa—lu utwa ha ku bulelwanga kuli, ka batu ba hesu babañata hahulu mwa lifasi kacenu . . .

Ka kuba mukutazi wa linzwi, ni zamaile misipili ye miñata nyana ya kusila mawate ni kupotoloha lifasi, Ni fitile mwa bulapeli bo buñata bo bu shutana, inge ba Buddha, ni ba Mohammedan, ni Sikhs, ni Jains, ni zeñwi cwalo, mwa bulapeli bwa lifasi. Mi cwale mo mwa United States ya luna kasibili; ni linaha zeñwi za kusili, ni kopani ni likeleke za luna ze shutana, ze cwale ka likopano za likeleke za luna, ku kalela Katolika ya makalelo ya Roma, mi cwale ni kwa ma Greek, ni zeñwi cwalo, ni ba—ba milao ya bulapeli bo bu shutana, mi hamoho cwalo ni ku shetumuka mwa . . . mwa masika kaufela, likopano ze shutana za Baipanguli ze eza naini handeleti.

Cwale, yeñwi ni yeñwi ya zona, luli, mwa kona kubona mulelo wa bona, mi ha Ni ba nyazi. Ifi ni ifi ya zona ba ipapata kuli bana ni niti, bali bana ni niti. Mi batu baba fumaneha kwa likeleke zani ba lukela ku lumela cwalo, kakuli ba itobohile bukamuso bwa—bwa bona, ko balibile kwa Kuyakuile, kuya ka

tuto ya keleke yani. Mi kono ba shutana luli, yeñwi ku yeñwi, kufitela baba ni lipuzo ze naini handeleti ni zeñwi ze shutana.

Kabakaleo, kakuba ze naini handeleti ni zeñwi za lipuzo ze shutana, ku lukela ku ba Kalabo iliñwi ye lukile. Mi Ni tabela kuli busihu bo, ka kuba kuli lulika kuya kwa Lihalimu, ni ku kopana ni Mulena luna Jesu Yo lu lata, Ni bata ku bala mwa Mañolo kuli ni fumane sani.

<sup>14</sup> Cwale, haiba ki puzo ya Bibebe, kona kuli i lukela kuba ni kalabo ya Bibebe. Ha i swaneli ku taha kufitela mwa sikhata sa batu, kuzwa kwa kopano yeñwi kaufela, kamba ku muituti yomuñwi, kamba kwa kopano yeñwi cwalo. I lukela kutaha ku zwelela fela mwa Mañolo, ko kufumaneha sibaka sa ku kopanela sa Mulimu, sa kulapelela. Mi kaniti, kakuba Mulimu, kuna ni sibaka sa makopanelo kokuñwi, ko A kopana.

<sup>15</sup> Cwale, lu fumana cwana fa kuli mwa Deuteronomia mo, kwa makalelo, Mushe wa kutakela Mañolo, ona lika za kile a ba bulelela; mo Akile aba zuseza ka lizoho le lituna, le li mata, kuzwa mwa Egepita, mi ni ku ba tomahanya pili.

Ne ba bizwa kuli “batu ba Mulimu” kufitela fo ba to zwela mwa Egepita, mi cwale ki ha se ba to bizwa kuli “keleke ya Mulimu.” Kakuli, keleke ki puteho, kamba, luli, *keleke* italusia kuli “baba bizizwe,” bona baba bizizwe. Mi se ba zwa mwa Egepita, kuli ba be keleke.

<sup>16</sup> Cwale Mulimu na ba bulelezi cwana, fani hane ba...ba si ka toma kale tempele ni ze ne ba ezize kaufela, “Ni ka keta sibaka sa Ka sa ku lapelela, mi Ni ka beya Libizo la Ka ku sona.” Mi sani kona fela sibaka seo Mulimu akona ku kopana ni mutu ufi kaufela, neli ka kuketa kwa Hae Luli. Na ketile sibaka sa Hae. Mi kwa Na ketile sibaka sa Hae, A beya Libizo la Hae teni. Timana ya 2 fa ya lu bulelela cwalo, “Na ka beya Libizo la Hae mwa sibaka sa Na ketezi sicaba sa Hae kuli ba mu lapele ku sona.” Cwale, taba yateni ki kuli, lu bata ku fumana ko kuinzi sibaka sani.

<sup>17</sup> Ka mihipulo ye naini handeleti ni yeñwi ye shutana, bakeñisa kuli se lu fitelela bulapeli bwa sihedeni, mi ka kubulela fela za bulapeli bwa Sikreste. Ili, bo Ni na ni maikuto ka bahedeni, kusi cwalo Ne ni sike ku yanga teni ni ku yo ambola ku bona. Kono, ba fosize. Bukreste kona fela bulapeli bwa nití, ki Bukreste. Mi ha Ni buleli cwalo kakuli Ni Mukreste; kakuli, Ni lumela kuli ki Niti. Kona fela bulapeli bo bu lukile.

<sup>18</sup> Ni bile kwa libita ko ku cinciwanga pelesa ye sweu kasamulaho wa lihola zene kaufela. Ko, Mohammad, muprisita yomutuna ni—ni mueteleli ya swana ni Kreste, na lukela kuba mupolofita, mi, ha Ni kakanyi kona sa na li sona, kasamulaho fela wa mizwale ba Maccabee. Kono cwale ha ne ba...A shwa. Na ipulela kuli u ka zuha hape ni ku to koma lifasi kaufela. Cwale, mwendi ka lihola zene kaufela ba cincanga balibelei, mi

ba beya pelesa ye sweu fa libita la hae. Ba ezize cwalo, ka lilimo ze likana litiki zepele, ba kulubela ku mu bona ha zuha hape ku to koma lifasi. Kono mwa bona . . .

<sup>19</sup> Mi hamuya ku ba Buddha; Buddha na pilile myaha ye miñata hahulu, mwendi ki mianda ye mashumi amabeli ka ye milalu kwa mulaho, yena mulimu wa—wa Japan. Mi kacwalo neli muituti wa litaba za ze bupilwe, baba swana sina Confucius, ni babañwi cwalo.

Kono ba kaufela, kakuli . . . bakalisi, ni babañwi cwalo, kaufela bona ba shwile ni lituto za bona, mi upumbekilwe u mwa libita.

Kono Bukreste, bo bu kalisizwe ki Jesu Kreste, kuna ni libita la mukungulu. Na li yena Mutu fela anosi yakile a yema mwa lifasi, ni kupila ni kubulela kuli, “Ni na ni mata a kubeya bupilo bwa Ka ni ku bu zusa hape.” Mi Na ezize ona cwalo. Mi Wa pila kacenu.

Miluziba kuli Wa pila, kakuli Uina ni luna mi u i paka Iliyena ka lisupo za butu ni limakazo, kakuli Na sepisize kuli Uka eza cwalo kuli a li bonahalise. Kuli mane, kuba Siita sa Mulilo sene si zamaisa bana ba Isilaele kukena lihalaupa, siina ni luna kacenu, mane nihaiba kuba ni siswaniso sa Sona sene si swanisizwe; nze si eza lisupo ni limakazo za Na sepisize kuli Si ka eza mwa lizazi le, ka kubona kuli Manzwi kaufela a Na sepisize ataha ku to talelezwa mwa lizazi le. Kabakaleo, kalulo ye siyezi ya lifasi la bahedeni i kwande. Ki Bukreste!

<sup>20</sup> Cwale, kakuba kuli kuna ni lipuzo ze naini handeleti ni zeñwi fahalimu ka za kuli Mulimu u kopanela kai, “U kopana ni ba Methodist, kamba U kopana ni ba Baptist, mi U kopana ku se, ni sani, ni sesiñwi.” Cwale, kuna ni puzo fani, kacwalo mañi ni mañi uswanezi ku bata piliso ya hae ka sabo ni ku ngangama.

Kono busihu bwa kacenu Ni bata kulika ku fumana, ni ku bonahaza mwa Mañolo, ko ku na ni sibaka se si lukile ko Mulimu akopana ni sicaba. Mi, haiba ku cwalo, sani kona sibaka fela sinosi ko Akana akopanelia.

<sup>21</sup> Cwale, lu ngile palo ye mwa Deuteronomia. Ki linzwi la Sigerike le lina ni litaluso zepeli, kamba, li talusa, “milao yemibeli.” Linzwi la Sigerike la kuli, *Deuteronomia*, litalusa “milao yemibeli yeshutana.”

Mi zeo kona fela Mulimu za nani, milao yemibeli yeshutana. Mi ulimuñwi wa yona ki mulao wa lifu, mi omuñwi wa yona ki mulao wa Bupilo. Mulimu una ni milao yemibeli. Ku Mu latelela, ni ku Mu sebeleza ni ku Mu lapela, ki Bupilo; ku I hana ki lifu. Kuna ni milao yemibeli ku Mulimu.

<sup>22</sup> Cwale, ulimuñwi wa milao no lemuhi—no zibahalizwe kwa lifasi, fa Lilundu la Sinai. Mulimu na file mulao ku Mushe ni Isilaele. Isiñi kuli mulao no ka ba tusa, kono mulao no ba

supeza fela kuli nebali baeza libi. Kufitela nako yani, ne ba sa zibi kuli sibi ne li sikamañi, kufitela ha to ba ni mulao. Haku koni kuba mulao kusina koto. Mulao ha ki mulao, ha ku sina koto. Konakuli, cwale, “Ku sa utwela mulao ki sibi, mi mupuzo wa sibi ki lifu.” Konakuli cwale, kufitela Mulimu ha na ti lo ba pangela mulao, ne ku sina bumaswe bo ne bulalelwa bona.

Haiba hakuna mulao fa o bulela kuli ha u swaneli kumatisa ka limaili ze mashumi amabeli ka hola, konakuli ne mu ka mata limaili ze mashumi amabeli ka hola. Kono hakuna ni mulao o bulela kuli ha mu lukeli kueza cwalo, konakuli kuna ni mulao ni koto mwa mulaho wa ona.

<sup>23</sup> Cwale, lifu, ona mulao wa lifu, neli litaelo zene filwe fa Lilundu la Sinai, o no bulelela mutu kuli nali mueza libi. Mi, ku hanyeze mulao wa Mulimu, a shwa. Kono hakuna piliso mwa mulao. Haili . . . Neli fela mapokola ya na kona ku mi beya mwa tolongo; no si na sa ku mi zusa ka sona.

Kono cwale Na file mulao omuñwi, fani neli fa Lilundu la Kalvari, fo sibi ne si balezwi ku Jesu Kreste, mi teñi fani koto ya sibi ya lifiwa. Mi isiñi ka . . . Kusina mulao, “kono ka muhau mu pilisizwe,” ka muhau wa Mulimu, kuya ka temuho ya Mulimu ya kubateni kwa mina.

<sup>24</sup> Cwale lu bona milao ye mibeli ye, Deuteronomia, ku ambola ka milao yemibeli. Ne ku nani milao yemibeli. Omuñwi neli mulao wa lifu, mi omuñwi ki mulao wa Bupilo.

<sup>25</sup> Nekuna ni bulikani bo bubeli bo ne bufilwe kwa batu. Luka ambola ka yona ka kusasana.

Omúñwi wa ona no filwe ku Adama ka taelo yeñwi, “haiba u ka eza se ni kusa eza *sani*,” kono mulao wani no lobilwe. Adama, Eva na u lobile, mwa simu ya Edeni.

Mi Mulimu ki ha eza taelo ya bubeli, ni ku ufa ku Abrahama, mi mulao wani no sina tamò fateni. “Ha ki so ezize kamba so ka eza;” Ki hali, “Ni ezize kale zeo.” Sani ki sishemo. Wani ki mulao wa Bupilo. Mulimu na ezelize Abrahama sani ni Peu ya hae kasamulaho wa hae, yani, ki Peu ya Abrahama kaufela yona.

Sina Bibele ha ibulezi kuli, “Isilaele kaufela ika piliswa,” kono sani ha si talusi Majuda. Sina Paulusi hana ize, “Ki Isilaele yani wa mwahali, kamba Isilaele wa kwande.” “Kwande,” inge mo ne lu bulelezi busihu bobuñwi, neli bana ba Isaka, ka kupepana. Kono mulao wa Mulimu neli ka Kreste, yene li Peu ya Silena ya Abrahama, kuli, “ka sishemo Isilaele kaufela u ka piliswa.” Fo kikuli, “Kaufela babali ku Kreste baka pilswa,” kaufela, bulikani bwa buleli bwa Mulimu. Kono lika ze kaufela ne li monyehela ku Kreste.

<sup>26</sup> Cwale mulemuhe mwa timana ya 2 fa. Timana ya 2 mo mwa Deuteronomia 16, “Milapelo mwa sibaka se Ni ketile.” Cwale mu

lukela ku lapela Mulimu, Na ize, “Mwa sibaka se Ni ketile,” isiñi sa ketile mutu usili, kono, “se Ni ketile.”

Cwale, haiba Mulimu na ketile sibaka, kwa lu lukela kuli lu fumane sa Na bulezzi ka sona. Mane ni kuli si fumaneha kai? Ni bata ku si fumana, kakuli, kaniti, Ni bata ku Mu lapela.

Kaufela luna luteni mo, busihu bo, ku to Mu lapela. Lu inzi mo busihu bwa kacenu, sina Methodist, Baptist, Katolika, Lipaki za Jehova, Sayansi ya Sikreste, ni babañwi, kono kaufela luna lu bata nto yeñwi.

Lu bata kuziba Niti. Bibebe ibulezi kuli, “Mu ka ziba Niti, mi Niti ika mi lukulula.”

Yomuñwi, hamukoni kuziba se mueza, ha u zibi mwa kuezeza kufitela ha u so zibile mwa ku si ezeza; ha u zibi sa kueza konji ha so zibile mwa ku si ezeza, nitaluse. Mu lukela kuziba se mueza ni mwa ku si ezeza.

<sup>27</sup> Se si bonisa kuli Mulimu una ni sibaka sa ku kopanela balapeli ba Hae, mwa sibaka sesiñwi. Mwa sibaka sani, fela, Mulimu kona mwa kopanela ni balapeli ba Hae.

<sup>28</sup> Cwale, hape, sibaka Sa ketezi balapeli ba Hae, Na ipulezi kuli Na ka beya Libizo la Hae mwateni. Cwale ha lu bateni ni ku fumana, kuya ka Mañolo, ko kuinzi sibaka se. Luli, haiba Mulimu na bulezzi kuli Na ka beya Libizo la Hae mwa sibaka se ona sa Na ketile ku kopana ni sicaba sa Hae ni ku lapela ni bona...kamba bona ku Mu lapela, nitaluse, kuli siteni mwa sibaka sesiñwi mwa Bibebe, kakuli neli sa masika kaufela.

<sup>29</sup> Mi Mulimu yomutuna yasacinci hakoni kucinca. Mutu wa cincanga. Kono mwa kona kubeya bupilo bwa mina fa sika kaufela sa kile a bulela Mulimu ka nako ifi kaufela, kakuli ki Niti. Ki yona Niti. Kakuli, yani kona taba inosi fela yeo Ni kona kuba ni sepo ku yona, ki Bibebe. Kakuli, linzwi la mutu li ka palelwaa, kono Mulimu ki ya ipitezi.

Mwaha wo Ni lukela kuziba zeñata kufita zene Ni ziba ñohola. Ni mina, ki cwalo, zazi ni zazi. Luna kuna ni fo lu palelewaa, kacwalo lwa ipumanela zibo.

Kono Mulimu yena ha palelwi. Yena ha palelwi. Mi, kakuba ya sa palelwi, Ha koni ku ekeza kwa zibo. Yena u petehile, ka kukala. Keto ifi kaufela ina ni kuba ye lukile.

<sup>30</sup> Mi mukwa wa kile aeza ka ona Mulimu nako yeñwi, U swanela ku ezanga ona cwalo kamita, kusi cwalo Na ezize ka mafosisa fani ha Na ezize sani ka nako ya pili. Haiba nji mutu utaha ku Mulimu kwa piliso, kuya ka mayemo a na Mu lumezi ka ona, a lukela ku amuhelwa ka ona mayemo a swana ani nako kaufela. Yani ki niti. Haiba mutu ataha ku Mulimu kwa foliso ya Bumulimu, mi ni Mulimu ha na mu amuhezi ka mayemo amañwi; mutu ya tatama ha taha, Una ni ku mu amuhela ka mukwa o swana, kamba Na fosize fani ha Na amuhezi mutu wa pili.

Mulimu na pangile mayemo a kuli Na ka kopana ni mutu ka ona. Na beile mayemo a sa Na ka eza, mwa Na ka si ezeza, mi sani ne li ka mali a ngu ya sitabelo mwa simu ya Edeni. Mulimu ali kuba, nihaiba nako iliñwi, a cince zeo.

<sup>31</sup> Na itakalelize mwa Na ka piliseza mutu. Lu likile kacenu ku luta mutu ku zona; lu likile kuba kenya sikolo ku zona, kulika ku ba ndanga ka lituto, kulika kuba kopanya, kulika kueza ona lika zeñwi ze kaufela za mifuta isili; kuba tisa mwateni, ku ba kenya ka ku nyunginya, kuba kolobeleza mwateni, nzila yeñwi kaufela ye liteni, ku ba kenya mwateni ka mañolo. Kono niteni u sa siyezi, ya swana, Mulimu u kopana ni mutu mwataso Mali a Ngunnyana. Mali neli nzila ya Mulimu kwa simuluho, mi Mali hape ki nzila ya Mulimu busihu bo. Ki hande kufa litifo za kubaka ni lika zeñwi ze kaufela, kono puluso itaha fela ka Mali. Mali kona fela nzila inosi ya na ketile Mulimu ya kupilisa mutu ka yona, mi Hakoni ku i cincia.

<sup>32</sup> Jobo nana ni taba ye swana. Na zibile kuli nali ya lukile, kakuli na file kale—kale sitabelo sa na bata Mulimu ku yena.

<sup>33</sup> Cwale, ha lu tatubeni cwale ni kubona sibaka se, mi ni sibaka sa Na beile Libizo la Hae ku sona. Lu kaba ni ku fumana kwa Na beile Libizo la Hae. Cwale, haiba lu fumana kuli Libizo la Mulimu ki lifi ni kwa Na li beile, kona kuli luna ni sibaka sa ku lapelela lu sa fumana fela zeo.

Lika ze kaufela, kaniti luli, neli miluti ya lika ze ne taha. Mulao kaufela no yemela lika ze ne sa taha.

<sup>34</sup> Kuswana inge, kweli haili muluti wa lizazi. Ya beleka ha kusina lizazi, inge fela Keleke mo i sebeleza ha kusina M-w-a-n-a Mulimu. Ha kusina Mwana, ona Liseli leli nyinyani, ili Keleke, balumeli, ba sebeleza Mulimu ni ku fa Liseli ha kusina Mwana. Kono cwale lizazi ha lipazula, ha mu sa bona kweli ni hanyinyani, kakuli se i likezi. Ha li sa tokwa liseli la yona hape, kakuli ifumana fela liseli la yona ka bunyinyani, kuzwa kwa lizazi. Cwale, inge muuna ni musala hae, kweli ni lizazi li cwalo, inge Keleke ni Kreste.

<sup>35</sup> Cwale lu fumana, kuli, lika ze kakuba miluti ya Kreste. Sitabelo kaufela, mukiti, ni lika kaufela mwa Testamente ya Kale, ne li yemela Kreste; inge fela muluti ha u natafafasi. Cwale fa kona fo lu ka fumana milapelo ye lukile, ki kukuta kwa mulaho mwa Testamente ya Kale ko ne li filwe ni kubona lika ze mo ne li inezi.

<sup>36</sup> Cwale, muluti ha u tahafafasi, mwa kona ku ziba kuli yo ki muuna, musali, kamba folofolo, kamba seo kaufela sili sona, kakuli si bonahalisa muluti wa sonafafasi. Mi cwale muluti wani ha unzo ba bu kuswani, muluti kakuba sika sa buhata; mi haku konahali kuba buhata kusina kuba niti. Kabakaleo, za niti ha litaha bukaufi ku za buhata, za buhata za miziwa ki za niti.

Muluti ni—ni sibyana sa niti litaha hamoho, mi sani kona se si eza lika kuba za niti.

Mi haiba “lika za kale kaufela,” Bibebe i bulezi kuli, “mwa Testamente ya Kale, ne li miluti ya lika ze ne sa taha,” konakuli cwale Kreste nali yena muluti wa lika ze sa taha.

<sup>37</sup> Kacwalo lwa kona kubona, ka mifuta ya Testamente ya Kale, kwa Na ketile kubeya Libizo la Hae, mi ni...ka cwale. Cwale, kuya ka muluti mo u inez, ha unata fafasi, Ni ize, ki muluti, kakuli ki mufuta. Kacwalo luna, balapeli, hape lwa kona kubona muluti ya mwa Testamente ya Kale ha i kenelela fela ku ye Nca.

<sup>38</sup> Cwale, mikiti kaufela, mazazi a pumulo, tabernakele kaufela, likota zani kaufela, lika kaufela mwa tabernakele, lika kaufela ne li swanisisa fela Kreste. Ona linubu kaufela, milao kaufela, lika kaufela neli li mwa mufuta wa Kreste. Lu se lufitile ku zona, nako ni nako, mo mwa tabernakele.

Mi lwa bona, ka ze, kuli tuto ya tumelo kaufela, keleke, mi kopano isiilwe kwahule kwa mulaho. Mane ha li yo mwa lusika, ni hanyinyani. Tuto kaufela ya tumelo, keleke kaufela, kopano ifi kaufela, isiyalezi kwa mulaho koo. Hakuna sibaka sa zona ni hanyinyani.

<sup>39</sup> Hakuna se si swanisizwe mwa Testamente ya Kale, kamba kai ni kai mwa Bibebe, ka za keleke, kono neli kuhapeleza kwa tawala ya Babele. Yani kona fela taba inosi ye swanisisa tamahano. Kakuli, neli ka Nimrod, muuna ya situhu ya na ilo hapeleza linaha zenyinyani kaufela kutaha mwa sibaka silisiñwi ni yona tawala yetuna ye. Neli milapelo ya bulapeli, kaniti luli, kono ne li sika lemuhiwa mwa Linzwi la Mulimu. Konakuli fani kona fo mu boneila kopano ya bulapeli iswanisiswa, tawala ya Babele, mwa Testamente ya Kale. Kanti, mane bulapeli bo neli bulapeli bwa luli, kono isiñi bulapeli bwa Linzwi la Mulimu.

<sup>40</sup> Mulimu ha si ka keta kubeya Libizo la Hae mwa kopano ifi kaufela. Ni bata Liñolo ka yona, haiba ku cwalo. Ni ziba kuli ba ipapata kuli U ezize cwalo, kono Ha si ka eza cwalo. Hakoni kubeya Libizo la Hae mwa libaka zeñata, kakuli Na bulezi kuli Uka beya Libizo la Hae mwa sibaka silisiñwi. Mi, ona sibaka silisiñwi sani, yeñwi ni yeñwi ya likopano za luna ibata ku bulela kuli kona sibaka sani, kono ha ku cwalo.

Kono ki kai kwa Na beile Libizo la Hae?

<sup>41</sup> Cwale, mi, Yena, Libizo la Hae ki lifi, pili? Lu lukela kuba (Libizo) ni ku fumana Libizo la Mulimu lu si ka fumana kale sika Sa beya mwa sibaka.

Cwale, lu fumana cwana kuli Nana ni malumbatina amañata hahulu. U bizwa kuli...Na bizizwe kuli “Ndate,” ili lilumbatina. Mi Na bizizwe kuli “Mwana,” yeli lilumbatina. Na bizizwe kuli “Moya o Kenile,” yeli lilumbatina. Na bizizwe kuli “Palisa ya Sharoni,” yeli lilumbatina. “Mulilima wa mwa

Libala,” ki lilumbatina, “Naleli ya Kakusasana.” “Jehova-jaire, Jehova-rafa,” mabizo a shutana, aswalani, a ku liulula ka ona, mi mane kaufela ona neli malumbatina. Hakuna ni lelikana la ona lene lili libizo.

Kono Una ni Libizo.

<sup>42</sup> Fani ha Na katani Mushe, Na sina Libizo haisali, mi A bulelala Mushe, “KINA YA LITENI.” Mi ha lubona Jesu fa lifasi, ku bulela mwa Maheberu kauhanyo yabu 6... Mu ni swalele, Muñoli Joani kauhanyo yabu 6. Na bulezzi kuli, “KINA YA LITENI.”

Ba bulela kuli, “Kiñi, Wena u Muuna ya si ka kwanisa kale myaha ye mashumi a ketalizoho ya kupepwa, kono ubulela kuli U ‘kile wa bona Abrahama’?”

<sup>43</sup> Ki hali, “Mane Abrahama a si ka bateni pili, NITENI.” Mi “NITENI” ne li Yena, sicacani sene situka mulilo, ona Siita sa Mulilo sene sili sicacani sa mulilo mwa mazazi a Mushe, yena “KINA YA LITENI.”

<sup>44</sup> Mi cwale lu fumana kuli Jesu naize, hape kuli, “Na Ni tile mwa Libizo la Ndate, kono ha mu Ni amuheli.” Cwale, Libizo la Ndate li swanela kuba Jesu. Yani ki niti. Libizo la Ndate ki Jesu, kakuli Jesu na bulezzi cwalo. “Na Ni lwezi Libizo la Ndate. Na Ni tile mwa Libizo la Ndate, kono ha mu Ni amuheli.” Konakuli, Libizo la Hae neli Jesu.

Mi Gabriele a Mu biza kuli Jesu, bapolofita ne ba Mu bizize kuli Jesu, mi Yena nali Jesu kaniti luli. Ku sikaba kale kupepwa kwa Hae, mane nihaiba mupolofita ya kenile na bizize Libizo la Hae kuli *Emanuele*, yeli kuli, “Mulimu una ni luna.” Cwale, “Mulimu na bonahalile mwa nama, ili kuli a takule sibi sa lifasi,” mi, ka kueza cwalo, Na filwe Libizo la Jesu. Kacwalo, Jesu kona Libizo.

Mi Libizo ne li beilwe ku Mutu; isiñi mwa keleke, isiñi kopano, isiñi tuto ya tumelo, kono ku Mutu! Na ketile kubeya Libizo la Hae ku Jesu Kreste. Cwale lu fumana cwana kuli kipeto Uba yena sibaka sa Mulimu sa ku lapelela, ko mu Mu lapela.

<sup>45</sup> Kwa mulaho kafoo A si ka pepwa kale, Libizo la Hae ne li bizwa kuli Jesu. Nekuli butokwa hahulu, ne li filwe ku boma He ka Lingeloi Gabriele, kuli Libizo la Hae ne li ka bizwa kuli “Jesu, Mwana Mulimu,” sa Na li sona.

<sup>46</sup> Ki fo he cwale, kanti. Se ki sona, sinosi. Ki sona, ku Yena fela anosi, sibaka sa ketile Mulimu sa ku lapelela. Sibaka sa Mulimu, si ketilwe. Mulimu na ketile ku kopana ni mutu; ne si mwa keleke, isiñi mwa kopano, isiñi mwa tuto ya tumelo, kono ku Kreste. Sani kona sibaka fela ko Mulimu u ka kopana ni mutu, mi wa kona kulapela Mulimu, ki ku Kreste. Sani kona fela sibaka sinosi. Hakuna taba kamba u wa Methodist, Baptist, Katolika, Muipanguli, seo kaufela ukona kuba sona, sani kona

fela sibaka sinosi ko mukona kulapela Mulimu ka swanelo, sani si ku Kreste.

Maroma 8:1, iize, "Cwale hakusana katulo ku babali ku Kreste Jesu, baba sa zamai ka nama, kono ba ya ka Moya." Yeo kona Evangeli.

<sup>47</sup> Lwa kona ku shutana ka lituto za litumelo. Lwa kona ku shutana ka maikuto a lituto za ipangezi mutu. Wa kona kuya kwa keleke ya Methodist, u swanezi kuba wa Methodist; wa Baptist, wa Baptist; wa Katolika, wa Katolika. Kono cwale mu sa kolobezwa fela ku Kreste, ni kuba silama sa Mubili wa Hae, kipeto hakusana shutano. Limota la fahali a lukwakwa li wezifafasi mi mu lukuluhile, kakuli mu inzi ku Kreste Jesu. Mi mu lapela Mulimu mwa Moya ni ka Niti ha mu li ku Kreste Jesu. Ki mulelo wa Mulimu kuli mu Mu lapele ku Kreste Jesu.

<sup>48</sup> Cwale, hakuna kopano ya keleke yekona ku ipapata se, hakuna mutu ya kona kuipapata cwalo. Ki wena mañi kuli unyamatale ku ipapata cwalo? Ku eza sika se si cwalo ikona kuba moyo wa antikreste, ki kuzwa ku Kreste; ku zusa ku Yena. Hamukoni kueza cwalo. Kreste ki yena fela sibaka sinosi seo Mulimu akopana ni balapeli.

<sup>49</sup> Kacenu ba bulela, kuli. Ni nani batu baba ni bulelela. Muuna yomuñwi na ni bulelezi ha ki kale hahulu, mwa Beaumont, Texas. Na ize, "Bo Branham, haiba libizo la mina ha li yo mwa buka ya keleke ya luna, ha muna kukena Lihalimu." Kana mukile mwa nahana ze cwalo? Musike mwa lumela taba ye cwalo yani. Ba nahana kuli mu lukela kuba wa keleke yani kusi cwalo hamukoni kuya kwa Lihalimu. Ani ki mafosisa. Ku lumela zani, ki antikreste. Ni ka bulela kuli: haiba mu ka lumela moyo o cwalo, mu latehile. Seo ki sisupo se sinde kuli mu latehile, kakuli ki ku zusa fateni sa ezize Mulimu. Mulimu na si ka beya Libizo la Hae mwa keleke ifi kaufela. Na Li beile ku Mwana Hae, Kreste Jesu, fani Yena ni Mwana Hae hane babile Alimuñwi. Sani kona sibaka sa luli sa ku lapelela. Hakuna mitomo yemiñwi yene tomilwe, hakuna licwe leliñwi.

Ku Kreste, yena Licwe, Ni yemi;  
Maneku asili kaufela ki lishabati.

Likopano lika bulumuka ni kuwa, linaha li ka yunda, kono Yena uka ina kamita. Hakuna sibaka sisili seo mutu akona ku fumana, ku to lapela Mulimu, kuli Mulimu abulele ku yena, hakuna sibaka sesiñwi kwanda sesili ku Kreste Jesu. Sani kona fela sibaka sinosi, sibaka fela seo Mulimu a ketile kubeya teñi Libizo la Hae, mi sibaka fela sinosi ko Akopana ni mutu, ku to lapela. Mu latehile, ku lumela sika si sili kaufela.

<sup>50</sup> Mulemuhe, mikiti kaufela ye supile ya Sijuda ne i beilwe mwa sibaka se siswana. Neba si ka buluka mukiti omuñwi *mo* wa ba Methodist, mi omuñwi *fa* hape wa ba Baptist, ulimuñwi kwa neku *lani* wa ba Presbyterian, ulimuñwi *kwanu* wa ba Katolika,

mi ulimuñwi wa Baipanguli. Mikiti ye supa kaufela ne i beilwe mwa sibaka se si swana sani.

<sup>51</sup> Ki mufuta omunde luli fa. Kona lu sa zo fita fela mwa Linako za Likeleke Zesupa, ku bonisa kuli Mulimu u bulukile Linako za Likeleke Zesupa kaufela mwa Linzwi, kakuli lusika ni lusika kaufela lwa keleke nelutisize siemba sa Linzwi, mi nako kaufela ye ne ba litisa ne ba bona Liseli.

Kuswana fela sina batu bene ba zibile ku kolobeza pili mwa Libizo la Jesu. Ne ba ezize sikamañi? Ne ba pangile kopano ku yona, mi se shwela ona fani. Mi ni Mulimu sa shimbuluka ku kena ku yomuñwi. Ha na kuina ku yeñwi ya lituto zani za litumelo ni za bulapeli. Hana sa kueza ni zona. Hakuna se si lyanganí ku Mulimu. Linzwi la Mulimu li kenile, halina ku zwakiwa. Kreste ki yena siemba sa fahali a milapelo ya Mulimu. Ki yena Mulimu.

<sup>52</sup> Ona mikiti ye supa kaufela ilukela kubeiwa mwa sibaka silisiñwi se. Ne mu si ke kubeya mukiti mwa sibaka sisili fela. Kono ona ye supa yani, sibaka . . . Mikiti ye supa ya silimo ilukela kubeiwa mwa sibaka silisiñwi. Kabakaleo, Linako za Likeleke Zesupa ne li na ni kuzwa mwa sibaka silisiñwi, yani neli Kreste yana bulela mwahala Linako za Likeleke Zesupa kaufela. Yeo ki niti luli. Mufuta, wa Linako za Likeleke Zesupa, kono ne ba pangile likopano kuzwa ku zona.

<sup>53</sup> Cwale ha lu talimeni fa mufuta omuñwi ha lu sa li onafa, ona, mufuta wa paseka, no bonahalisa Jesu. Lu lemuha fa sitabelo sa mali, ka lifu. Sitabelo sa mali neli sibaka sene si monyehela Kreste. Kana kopano ya kona ku lota mali; kana mwa kona ku nahana keleke kuli i lote mali, kulota mali kwa kopano? Batili kutokwa. Ne si lwala mali, kuli alote kuzwa mwa bupilo. Mi, ni bupilo, fa Jesu utaha mwa ponahazo ka ngu. Ngu neli mufuta wa Kreste, ni ku monyehela Kreste, kakuli nali Yena “Ngu ya Mulimu,” ya na zibahalisizwe ki Joani, “ye takula sibi sa lifasi.” Lu fumana Jesu inza u bonahala inza taha, mo mwa Exoda kauhanyo ya 12.

<sup>54</sup> Mulemuhe, neli sona sibaka sinosi seo lifu ne li si ke ku nata. Fani lifu hane libata ku nata na ha, ne kuna ni kuba sibaka sesiñwi; kaufela kuzwa kwatasi kwa ne ba shwile. Kwanda sibaka fela silisiñwi! Cwale, ne ku sa talusi kuli ki ndu iliñwi; kono ne ku na ni sibaka silisiñwi, kwani kona ko ne ku bulaezwi ngu. Kone ku na ni mali a ngu, lingeloi la lifu ne li palezwi ku nata, kakuli neli sona sibaka silisiñwi ko Mulimu na beile Libizo la Hae. Mi ngu yani ne i bulezwi kwani kwa simuluho, kuli ki ngu. Mulemuhe, neli sibaka silisiñwi se ne li palezwi ku nata.

<sup>55</sup> Mi cwale ki taba yeswana ni kacenu. Kuna ni fela sibaka silisiñwi seo lifu la moyha likoni kunata, sani ki Linzwi. Lifu ha likoni kunata Linzwi, kakuli Ki Linzwi lelipila la Mulimu.

Kono ha mu beya lituto za litumelo ku Lona, kipeto Linzwi la itamaela ku Lona liñi. Li ka kauhana inge mezi kwa oli. Hamukoni ku li kopanya hamoho. Kabakaleo, mwa bona, mi lituto za litumelo ha litaha mwa kopano, kaufela bona ba ka likanyisa lituto zeo; mi kipeto Linzwi la shwa, mi la ya ni mutu usili ni Ku ekezeha hahulu. La hula fa nako nyana, inge mo ne Li zwezi kwa kuluka, ku keniswa, kolobezo ya Moya o Kenile, mane ni kukena cwalo mwa Bubeke! Kana mwa bona nzila yeo Mulimu a zamaile ka yona? Kutisa Libizo la Hae, ka nako kaufela, ona cwalo ka nzila yeswana, kakuli ki Yena Linzwi.

Mulemuhe, ha Likoni kushwa. Linzwi la Bupilo ha likoni kushwa.

<sup>56</sup> Mulemuhe mo ku petahalezi, cwale. Lingeloi la lifu ne li si ka haniswa kunata sicaba se situna sa Egepita sa ngana ya butu. Ne li si ka haniswa kunata libaka sa yona ze kutekeha, miyaho ya yona yemituna, bo faro ba yona. Kamba, baprisita ba naha, lingeloi ne li si ka haniswa ku yo nata. Ne li lukela kunata muyaho ufi ni ufi kaufela, mwa sibaka kaufela, mañi ni mañi, kono ne li sa lukeli kunata kone kuna ni ngu.

Lifu ha likoni kunata ko kuna ni sibaka se si ketilwe ki Mulimu se, mi sani ki Ngu.

<sup>57</sup> Mulemuhe, mane nekusina nihaiba . . . ne li hanisizwe kunata Isilaele kamba baprisita ba Siheberu, mi, kamba yeñwi kaufela ya likopano za bona. Kaufela bona ba swanela kuba mwa sibaka sa ketile Mulimu, sa lukisize, kusi cwalo lifu ne li natile.

<sup>58</sup> Keleke, kaufela ko mu inzi, kaufela ko mu wela, ha si nifi shutano. Kono, kuna ni nto iliñwi ye mu lukela kuziba, mu lukela kuba ku Kreste kamba mu shwile. Hamukoni kupila kwanda Yena. Keleke ya mina ya kona kuba hande, sina fela muyaho; kopano ya mina ya kona kuba yende, kakuba mutu. Kono ha mu tima Mubili, ona Mali, Linzwi la Jesu Kreste, mu shwile ka muzuzu o mu ka eza cwalo. Ki sibaka sa ketile Mulimu sa ku lapelela. Kwani kona ko ku fumaneha Libizo la Hae, kaniti. Kwani kona kwa Na ketile kubeya Libizo la Hae; isiñi mwa keleke, kono ku Mwana, Jesu Kreste.

<sup>59</sup> Mulemuhe, buiketo ne bu beilwe fela mwa sibaka sa kuketa kwa Hae, ku ngunyana ya Hae, mi ka libizo la ngunyana.

<sup>60</sup> Mulemuhe, neli ngu ya “muuna”, ya poho, isiñi ya sitole. Isiñi keleke, musali; kono Libizo la Hae, isiñi libizo la hae kakuba musali. Kwa Na ka yo kopana ni sicaba ne si mwa libizo la musali, kono ka Libizo la Hae, Yena, yali Ngunyana!

<sup>61</sup> Cwale lu bulela kuli, “Keleke, yetuna, keleke ye mata, na ezize se hape aeza ni *sani*. U pimile fa sikala. Lu beilwe mwa sikwata. Lu babañata mwa palo. Luna lu keleke ye mata. Yena ki nto yetuna.”

Kono Mulimu na si ka bulela sika kaufela ka yena. Na ize, “Yena.” “Yena,” kona sibaka sa makopanelo, yena Ngunyana, isiñi mwa keleke. Isiñi libizo la musali, kono Libizo la Hae kakuba muuna. Na si ka beya libizo la musali kai kamba kai. Na beile Libizo la Hae kakuba muuna ku “Yena”!

Ki kabakaleo, “Kaufela se lu lukela kueza, kamba ki linzwi kamba ki kezo, lu lukela ku si eza ka Libizo la Jesu Kreste.” Haiba lu lapela, lu swanela kulapela ka Libizo la Jesu. Haiba lu kupa sika, lu swanela ku kupa Libizo la Jesu. Haiba lu zamaya, lu zamaya ka Libizo la Jesu. Haiba lu bulela, lu bulela ka Libizo la Jesu. Haiba lu kolobeza, lu swanela ku kolobeza ka Libizo la Jesu Kreste. Kakuli, “Kaufela ze lueza ka linzwi kamba ka kezo, mu eze kaufela ka Libizo la Jesu Kreste.”

<sup>62</sup> Mutu yomuñwi na ize ku na nako yeñwi, a bulela cwana, mi ali, “Muzwale Branham, musala ka, ha Ni . . .” Ki hali, “Musali, libizo la hae ki *Cwana-ni-cwana*.” Ki mukutazi, mwendi uteni mwahali mo cwale. Mi ki hali, “Musala ka,” ali, “una ni libizo la ka.” Ni ka bulela fela kuli Jones, kakuli ne si Jones. Na bulezi kuli, “Cwale, ha lukeli ku zuha kakusasana ni kakusasana, uunga lufiyelo mi uli, ‘Cwale Ni fiyela ka libizo la Jones, mi ni tapisa mikeke ka libizo la Jones, mi Ni tapisa litino ka libizo la Jones.’” Mi ali, “Hani sepi kuli muna ni ku biza libizo lifi kaufela.”

Se nili, “Ni sepa ku cwalo.” Yani ki niti.

Mi ki hali, “Kihande, kiñi? Ha lukeli kubulela cwalo. Lik kaufela za eza Jones, ka kukala.”

<sup>63</sup> Se nili, “Kono no si ka zamaya mwa mukwakwa ku yo munga, mi ali, ‘Cwalo nya, Jones.’ Nana ni kuba cwalo, pili, ka mukiti, mukiti wa linyalo, ‘Jones.’ Kambe na si ka eza cwalo, mu pila mwa boozwa. Mi haiba mu kolobelizwe ka nzila isili kaufela kwanda Libizo la Jesu Kreste, ki kolobezo ya boozwa, ye sa fumanehi mwa Bibele.”

Cwale, “Se mueza ka manzwi kamba likezo, mu si eze kaufela ka Libizo la Jesu,” kasamulaho wa fani, se mueza. Kono pili muna ni kutaha ka Libizo la Hae.

<sup>64</sup> Kuna ni basali babande babañata mwa muyaho wo busihu bo, hande, basali baba ishuwile; kono kuna ni Musala bo William Branham alimuñwi. Ki yena yaya kwa ndu ni na. Yo ki yena yali musala ka.

<sup>65</sup> Kuna ni batu babande mwa lifasi, likeleke zende; kono kuna ni Musala Jesu Kreste alimuñwi, mi yani ki yeo Ya tahela. Mwani kona mo ku tomilwe Libizo la Hae. Kwani kona ko ku fumaneha milapelo ya Hae, ku Yena mi Yena musali anosi. Yani ki niti. Oh, eeni, sha. Lu fumana yani kuli ki niti.

<sup>66</sup> Cwale, ki kabakaleo, luna, “Kaufela se lueza ka manzwi kamba ka likezo, lu eza ka Libizo la Jesu Kreste.”

“Hakuna libizo lisili le li filwe mwatasa Lihalimu la piliso, kono ka Libizo la Jesu Kreste.” Likezo, kauhanyo ya 2, ibulela kuli, “Kakuli taba ye izibahale ku mina . . .” “Hakuna libizo leliñwi le li filwe mwatasa Lihalimu leo mutu alukela ku piliswa ka lona, konji ka Libizo la Jesu Kreste fela.” Amen. Na sepa mwa utwisia. Libizo la Jesu Kreste, kaufela . . .

Lihalimu la kwa Mahalimu li bizwa ka Yena, “Lubasi kaufela mwa Lihalimu lu bizwa ka libizo la Jesu,” Bibele ibulezi kuli, “ni lubasi kaufela mwa lifasi lu bizwa ka Jesu.” Kacwalo lani kona Libizo la ketile Mulimu ni ko A Li beile. Sani kona sibaka sa Hae sa ku lapelela, ki ku Jesu Kreste. Cwale, lu ziba kuli zeo li cwalo, hakuna sibaka sisili sa ku lapelela kono konji ku Yena.

<sup>67</sup> “Hakuna libizo leliñwi mwatasa Lihalimu le li filwe ku mutu, ili ka lona lu lukela kupiliswa.” La Hae ki Libizo la Mulimu la kuliulula. Mulimu una ni libizo u bizwa Jehova-jaire, Jehova-rafa, Jehova-jaire. “Mulena ya swalela libi za hao kaufela.” *Jehova-rafa*, “Mulena ya folisa matuku a hao kaufela.” Nana ni malumbatina amañata hahulu. Kono una ni Libizo la Ku liulula, zani neli mwa lusika lwa batu, mi lani ki Libizo la “Jesu.” Leo kona Libizo la Hae, Na ketile ku li beya. Kikai kwa Na Li beile? Na Li beile ku Kreste.

<sup>68</sup> Mabizo asili kaufela a keleke, lituto za litumelo, malumbatina, ki lifu ku sepa ku ona. Mu sepa libizo la keleke ya Methodist ku mi isa kwa Lihalimu, mu latehile. Haiba mu sepa ba Pentekota, keleke ya Pentekota kuli i miise kwa Lihalimu, mu latehile. Mi ba Baptist, Lutheran, Presbyterian, Katolika, keleke yeñwi kaufela; mu sepa libizo la bona, kamba lilumbatina la bona, kamba tuto ya bona ya tumelo, mu latehile.

Kakuli, hamukoni nihaiba kulapela konji pili mutahe mwa sibaka sa ku lapelela. Amen. Sani kona fela sibaka sinosi seo Mulimu akopana ni mulapeli, kona sibaka sa Na ketile kubeya Libizo la Hae. Zeñwi kaufela, ha mu sepa ku zona, mu ka shwa. Ni yena hape . . .

<sup>69</sup> Muluti omuñwi wa Jesu fa, Ni ñozi, Mañolo amañwi. Hape, Na—Na bonahalezi fa, “Una ni kuba ya sina litiba.” Ona sibaka Sa beile Libizo la Hae, ngunyana ye i lukela kuba ye sina litiba.

Cwale, ki kopano ifi kamba mulao o mu ka tamahanya se ku yona; ki keleke mañi, Katolika, Muipanguli, Mujuda, kaufela seo ili sona? Ki mulao mañi, kopano, ye mu kona ku tamahanya se ku yona, “ye sina litiba ku yona”? Kaufela zona li hanilwe, ni ku tobohiwa!

Kono kuna ni sibaka! Haleluya! Sibaka sani si inzi ku Jesu Kreste. Hakuna litiba ku Yena. Hakuna bumaswe ku Yena.

Hamukoni ku tamahanya se. Batu ba kaufela baba lika kueza cwalo, bali keleke ya bona haina bumaswe ni zeñwi ze kaufela. Ki masila, balobi ba Linzwi, baba lata, kono ba shwile neku, ba

Laodesia, mwa tuto ya litumelo, kono ha ki Niti. Kono nihaiba Pilato kasibili, sila sa Hae, naize, "Hakuna mulatu o ni fumani ku Yena." Sila sa Hae luli ne si pakile kuli ne kusina mulatu ku Yena. Hakuna se mukona ku Mu tameleza.

<sup>70</sup> Na bulezi kwa baprisita ba mazazi a Hae kuli, "Ki mañi wa mina ya kona ku Ni nyaza ka sibi? Ki mañi ya kona ku Ni bonisa kuli Ni mueza libi?"

Mu ni bulelele keleke iliñwi ye ka bulela kuli hakuna bumaswe bo i ezize fateni. Kaniti, hakuna nihaiba iliñwi ya zona, ko kutokwa, kono kaufela zona li bulaire ni kueza lika kaufela ze liteni fa kalenda ze lukela kuezwa, ko kutokwa. Kono niteni ba ipize kuli... Konakuli ha ki sibaka sa Mulimu sa ku lapelela, mwa tuto ya tumelo kaufela kamba kopano.

<sup>71</sup> Balikani baka, Hani lati ku holofaza maikuto, kono Ni na ni buikalabelo kwa Liñusa, mi, Liñusa leo ki kuli, "Amuzwe mwa busafa boo!" Mi haiba Ni mi kupa kuli muzwe ku zeo, ki kai ko Ni ka miisa? Kana Ni ka miisa kwa Branham Tabernacle? Ina ni mafosisa inge zeñwi kaufela mo li inezi.

Kono kuna ni sibaka silisiñwi ko Ni ka miisa, ko mu iketa ni ku silelezwa kwa lifu, sani ki ku Jesu Kreste, sibaka sa ketile Mulimu sa ku lapelela. Sani kona sibaka se Ni mi zibahaza ku sona, busihu bo, kwa na beile Mulimu Libizo la Hae. Kwa Na sepisize kuli Na ka kopana ni mutu kaufela yana ka taha kwani, Na ka lapela ni yena ni kuca ni yena, kwani ki ku Kreste; ha ki mwa keleke, ha ki mwa tabernakele.

Kono, ku Kreste, Yena ki yena Tabernakele ya Mulimu. Ki Yena sibaka kwa na tile Mulimu, Yena kasibili, ni ku to pila ku Yena. "Yo ki Mwana Ka ya latwa, ki ku Yena mo Ni tabela kuina." Mwani kona mwa na yahile Mulimu, atisa Libizo la Hae ni ku to Li beya fahalimwa, Jesu Kreste. Kabakaleo, Libizo la Hae ne li li beilwe ku Mutu, Mwana Hae, Jesu Kreste, ili mona mwa Na ti lo yaha Yena luli, mi ni mwa Tabernakele yani.

Koo, mwa mufuta, wa Jerusalema ya kale, mikiti ya kale, tempele ya kale, neli fela mufuta; mi musi hane ukena mwateni, zazi lene ikeni areka mwahali, ya bulikani, ni ku lulafafasi, mi ni Linzwi la Mulimu la utwahala mwateni.

Kona mo ne li utwahalezi ni Linzwi la Mulimu, inze li taha mwa Tabernakele, Jesu Kreste; yena, wa Kale mwa (nama) yana li mufuta wa muluti wa ze Nca. Mi ha Na tile ku Kreste, A li, "Yo ki Mwana Ka ya Latwa, Yo Ni katelwa kupila teñi. Mi Ni ka keta sibaka ko Ni ka beya Libizo la Ka, mi ni ko Ni ka kopana ni mutu, mi ni ko Ni ka lapelela." Mulimu na ketile sibaka; isiñi mwa kopano ya keleke, kono konji ku Jesu Kreste. Eeni, sha.

<sup>72</sup> Uswanelia kuba hape "yasina mulatu," sina ha Ni bulezi. Hakuna kopano yekona ku ipapata cwalo. Ba ipapata; ki bo antikreste.

<sup>73</sup> Cwale lu fumana cwana fa, mulemuhe muluti wa Hae hape. Ngu—ngu i lukela kubeiwa. Cwale, se si fumananwa mwa Exoda 12, haiba musweli ku ñola, ki Exoda 12:3 kuya fa 6. Ngu i lukela ku bulukiwa ka mazazi amane, kuli itatubiwe, kubona haiba ya swanela ku ya kwa sitabelo. I lukela ku lwalawa, i tatubiwe kukuta kutela, ka mazazi amane, kubona haiba ina ni fo inyazahala ku yona, kubona haiba kuna ni matuku ku yona, kubona haiba kuna ni se si fosahalile ni ngu yateni. I lukela kubulukiwa ka mazazi amane.

<sup>74</sup> Cwale mulemuhe. Babañwi ba ku mina mukona kunahana kuli yani neli ye nyinyani cwalo, yene bulaiwanga ka la fountini. Kono, mwa hupula, ne ba shimbanga ngu ka lizazi la bu lishumi kwa kweli, ni ku ibulaya ka lizazi la bu fountini kwa kweli, mwabona, yene bulukiwanga ka mazazi amane.

<sup>75</sup> Cwale, Jesu, Libizo la Mulimu, Ngunnyana, na ile mwa Jerusalemu mi na si ka zwa mwateni hape kufitela lifu la Hae, kupumbekwa, ni zuho. Na bulukilwe mwataswa kulwaniswa ka mazazi amane ni masihu amane. Ha ki swanelo ni yeo Ngunnyana yani mo ne iswaniselizwe, ku bulukiwa ka mazazi amane. Fani kona foo Pilato hana ize kuli, “Hani fumani mulatu ku Yena.”

<sup>76</sup> Muluti omuñwi wa Hae, hakuna lisapo ku Yena, wo no lukile, hane ku palile. Ka kubulaya sitabelo, ne ba si ka loba niheba lisapo. Kambe nekuli cwalo, ne ku hanisizwe. Mi ne se ba comozi kale sando kuli ba to lobaka masapo a kwa mautu a Kreste, fani hane baize kuli, “U shwile kale.” Ne ba mu tabile kwa makupo a Hae ba fumana Mali ni mezi.

<sup>77</sup> Mulemuhe hape taba yeñwi yetuna fa. Hani koni ku ifitelela fela, kakuli Na yemezwi mwa linubu, yona nubu ya sico.

Ni hupula nako yeñwi neba na ni sikolo, mwa Bibele, sene si bizwa kuli sikolo sa bapolofita, mi neli sikolo ni kamuso. Mi lu fumana kuli Elia nazwezi kwa sikolo kwani zazi leliñwi, mi se bali, “Luna . . .” Ba mu lapela kuli amu tokolomohe, bali, “Ha utaha kwanu, lika li namile hande nde.” Kacwalo ne ba bata kuli azwe aikele.

Mi ba yo mungela lico. Ni sikwata sa baprista saaya ni sona, kamba bapolofita, kuli ba yo nga manawa cwalo, kuli ba to mu lukiseza sico sa mulalelo. Mi hane ba ezize cwalo, ba kubukanya libunda tuna la ona; mi cwale ha ba kuta, neli biwana, byene bili mabeela, mi ba li beya mwa poto. Mi lipoto za kala kubila, mi bona, yomuñwi, ali, “Mawi, ka bumai kuna ni lifu mwa mupika. Cwale mane halukoni nihaiba cuca.”

Mi Elia ali, “Aku ni tiseze sico mwa lizoho.” Mi ki ha nga sico ni ku si beya mwa poto, mi kubulela kuli, “Ca. Poto i folisizwe.”

<sup>78</sup> Nubu ya sico neli Kreste. Mubulelelo kaufela nona ni kuba o swana, mi ni siemba kaufela sa sico ne si lubilwe ka kuswana, mwa nubu ya sico. Kubonisa, kuli, ki Yena mufolisi. Wa yolisa, ni kuzusa fateni lifu, ni kubeya Bupilo; ka milao yemibeli.

Haleluya! Ko kuna ni lifu, sibaka silisiñwi; mi Kreste ha taha mwateni, Bupilo bwa taha mwateni. Yena ki ya swana maabani, kacenu, ni kuyakuile. Mi fone kuna ni lifu, ne kutile Bupilo, kakuli Kreste yani na tisizwe mwateni, yena nubu ya sico.

<sup>79</sup> Ki tuto kwa butuna cwani mo lika bela lika ze haiba lunga nako ya ku li kauhanya hande! Cwale mulemuhe, hakuna niheba linzwi lililiñwi la muluti lene li palezwi. Hakuna niheba linzwi lelikana le li kile la palelwa, la muluti. Lika kaufela ne li zamaelela handende.

Yena ki yena sibaka sa ketile Mulimu sa ku lapelela, mi Libizo la Mulimu lifilwe ku Yena. Ki yena sibaka sa Mulimu sa ku lapelela, mi Libizo la Mulimu li filwe ku Yena. Ki yena Linzwi la Mulimu, mi ki Yena Libizo la Mulimu. Ki yena zepeli cwalo Linzwi la Mulimu ni Libizo la Mulimu. “Na li yena Linzwi lene li ezizwe nama.” Na li yena Linzwi la Mulimu, Ngunyana ya Mulimu, Libizo la Mulimu, mi neli yena Mulimu. Sani kona sa Na li sona, sibaka se si ketilwe mi ili sona sinosi fela sa ku lapelela Mulimu.

<sup>80</sup> Mi Mulimu uhanile libaka zeñwi kaufela zeli kwande a Jesu Kreste; hamukoni ku Mu lapela kusili fela. Na bulezi kuli, “Ba Ni kubamela mwa mbango, baluta batu litaelo za nama kuba Tuto.” Kacenu luna ni lituto za litumelo, lituto za litapelo, ni lika zeñwi, ba luta kuli *ye* kona nzila mi *yani* kona nzila.

Mi Jesu ali, “Ki na Nzila, ki na Niti, mi ki na Bupilo, mi hakuna mutu yakona kutaha ku Mulimu haisi ka Na.” Ka manzwi amañwi, “Ki na Munyako kwa mulaka wa lingu. Babali kwande kaufela ki masholi.” Ki yena fela muzamao o swanela. Ki yena Munyako. Ki yena Nzila, ki yena Niti, ki yena Bupilo, kaufela ze li teni; kona fela makenelo, sibaka sinosi fela, yona milapelo fela inosi, ni Libizo fela linosi.

Lika kaufela li tomilwe ku Jesu Kreste. Testamente ya Kale kaufela itamilwe ku Yena. Testamente ye Nca itamilwe ku Yena. Mi ni Keleke kacenu itemilwe ku Yena, ka Linzwi la taelo ya Hae. Hakuna sibaka sesiñwi, kamba Libizo leliñwi, kamba kai kaufela, koo Mulimu asepisize ku kopana ni mutu; konji fela ku Jesu Kreste, ona sibaka sa Hae sa ketile sa ku lapelela.

<sup>81</sup> Mulemuhe, Mulimu u sepisize ku kopan ni balapeli ba Hae mwa sibaka fela silisiñwi, mi yani kona keto ya Hae Kasibili; ha ki ka kuketa kwa luna, ha ki ka kunahana kwa luna; kono ki kunahana kwa Hae, kuketa kwa Hae. Mi ikaba sibaka kwa Na beile Libizo la Hae, kwa Na ketile. Kacwalo lu fumana kone kuinzi Libizo la Hae, sa Na ketile, ka kuketa kwa Hae Kasibili.

<sup>82</sup> Cwale kakuli ke lu fumana sibaka kwa Na beile Libizo la Hae, fo ki kuli, ku Kreste Jesu, mi hakuna sibaka sisili, kamba hakuna libizo lisilil, kana mwa ikolwisia ka seo? Muli, “Amen.” [Puteho ili, “Amen.”—Mu.] Cwale, taba yateni ki kuli, haiba lu

fumana ko kuinzi sibaka se... Sibaka sa ku lapelela teñi ha si yo kusili, konji fela ku Kreste.

Mwa kona kubaka, mwa kona kueza cwalo, kono ha mu si ka kala kale ku lapela. Mu kupa swalelo. Pitrosi naize kuli...

Ka Lizazi la Pentekota, fani hane ba ba boni kaufela haba bulela ka malimi asili, ni lisupo zetuna ni ze komokisa ha linga sibaka, ba kala kuseha, keleke ne i sehile, mi bali, "Baana ba ba kusi veine yanca. Ba eza inge batu babakozwi. Ba..." Maria mwalyanjo, kaufela bona, nali hamoho, ni baba mwanda ka bababeli ba bona. Mi ne ba tantalika inge batu baba kozwi, ni kubulela ka malimi, ni ku zwelapili. Se bali, "Baana ba ba kusi veine yanca."

<sup>83</sup> Kono Pitrosi, a yema, ali, "Mizwale ni bana bahesu, baana ba ha ba si ka kolwa veine yanca, kakuli isali hola ya bulalu mwa musihali. Kono se kona sene si bulezwi ki mupolofita Joele hana ize, 'Mi ku ka ezahala cwana mwa mazazi a maungulo, ku bulela Mulimu, kuli Ni ka sulula kwa Moya wa Ka fahalimwa nama kaufela; bana ba mi ba bashimani ni basizana ba ka polofita; fa bana ba basizana ba Ka ni batanga ba micaha Ni ka sulula Moya wa Ka. Ni ka bonisa lisupo mwa lihalimu, ni mwa lifasi; mulilo, misumo ya mulilo, musi wa mbundi. Li ka ezahala, ku si ka taha kale Lizazi lelituna le li sabisa la Mulena, kuli kaufela ya ka biza fa Libizo la Mulena u ka piliswa.'"

<sup>84</sup> Ha ba utwa cwalo, ba tabeha mwa lipilu, mi bali, "Bana bahesu ni mizwale, lu ka eza sikamañi?"

<sup>85</sup> Pitrosi ali, "Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo ya libi za mina, mi mu ka amuhela mpo ya Moya o Kenile. Kakuli sepiso ki kuli masika kaufela a sa taha." Cwale lu fumana ona cwalo.

<sup>86</sup> Cwale lu bata kufumana mo lu kenela *ku* Yena. Lu kena cwani mwa sibaka sa ku lapelela se? Makorinte Bapili 12 ya alaba hande, kuli, "Ka Moya ulimuñwi!" Isiñi ka keleke iliñwi, isiñi ka tuto iliñwi ya tumelo, isiñi ka mulisana alimuñwi, isini ka bishopu alimuñwi, isinñ ka muprisita alimuñwi. Kono, "Ka Moya o Kenile ulimuñwi luna kaufela lu kolobelizwe mwa Mubili ulimuñwi," ili Mubili wa Jesu Kreste, mi u ipeya kutwela mpo kaufela ye fumaneha mwa Mubili wani. Eeni, sha! Hakuna kuikopanya, hakuna kupeta lituto za litumelo, hakuna ku kashaka, ku ñala, kuswalana mwa mazoho, kamba hakuna nto ni yeñwi. Kono, ka Kupepwa lu kolobelizwe mwa Mubili wa Jesu Kreste! Amen. "Ka Moya o Kenile luna kaufela lu kolobelizwe mwa Mubili ulimuñwi."

<sup>87</sup> Mi Mubili wani ki sikamañi? "Kwa simuluhu nekuna ni Linzwi, mi Linzwi nali ku Mulimu, mi Linzwi neli Mulimu. Mi Linzwi la eزوا nama mi la to yaha ku luna." Lu kona kuba cwani mwa Mubili wani ni kuhana Linzwi la Teni, kamba ku Li beya

kwatuko kusili ko Li si yo nihaiba mwa Mubili? Lu kona kueza cwani zeo? Sibaka sa ketile Mulimu sa ku lapelela!

<sup>88</sup> Mulemuhe, mi ha mu kolobelizwe ka niti ku Yena, bupaki bwa niti ki kuli mu Mu lumele, yena Linzwi.

Mukona kuba cwani siemba sa Hae ni ku Mu latula? Ni kona kulantula cwani lizoho la ka inge lili lizoho laka? Haiba kuna ni... Haiba Ni eza, kuna ni se si fosahalile mwa munahano wa ka. Mi Ni kona cwani kueza cwalo? Haiba kuna ni se si fosahalile mwa booko bwa ka, ni hane lizoho la ka, ni hane liutu la ka, kuna ni se si fosahalile ka moyo ku mulumeli ya hana Linzwi la bulezzi Mulimu ni ku sepisa. Kuna ni se si fosahalile mwa moyo wa ya ipiza kuli ki mulumeli.

<sup>89</sup> Hamukoni ku latula taku iliñwi ya Hae, kakuli se mubile siemba sa ze swana. Mu siemba sa Hae kakuli mu kolobelizwe ku Yena; ka, Moya o Kenile u mi tisize mwa Mubili wa Jesu Kreste. Ki nto yende cwani!

<sup>90</sup> Mulimu una ni sibaka sesiñwi kwa Na—Na katani Abrahama, mi kwani Abrahama ki ha lapela. Kuya cwalo mwa Testamente kaufela!

Mi Linzwi la Hae le li sepisizwe li ka tolokwa ku mina, ka Yena. Kana mu utwile seo? Linzwi la Na sejisize ku taleleza mwa lizazi le mu pila ku lona: mukaba liñolo le li ñozwi la Mulimu, le li baliwa ki batu kamukana. Isiñi ze mu ipapata, kono ki seo Mulimu aeza ka mina, kona se si ka bulela hahulu kufita sika kaufela se ne mu ka bulela. Mulimu naize kuli, “Lisupo ze li ka latelela baba lumela.” Zani li ambola kufitela ku mina.

<sup>91</sup> Na bulezzi ka lusika loo, sene si ka ba ka nako ye. Balumeli ba lusika lo bana ni ku lumela Se, sa Na sejisize kacenu. Ka kuswana fela inge mo ne ba kenezi mwa areka, ku to piliswa; kuzwa mwa Egepita ku yo piliswa; bana ni kukena ku Kreste, kuto piliswa cwale, kukena mwa Liñusa la Linzwi, kuli Wa swana maabani, kacenu, ni kuyakuile.

<sup>92</sup> Mu kena cwani ku Ona? Ka kolobezo! Kolobezo ya sikamañi, mezi? Ka Moya o Kenile! “Moya Ulimuñwi, luna kaufela lu kolobelizwe mwa Mubili ulimuñwi.”

<sup>93</sup> Mi Linzwi la Hae leli sepisizwe, Hana ku... Hamuna ku Li toloka. Uka Li toloka ku mina; se mu eza, sa Na sejisize kueza. Keleke ye Mu latelela ika swana hahulu ni Yena mane batu ba zibe.

Matalime ku Pitrosi ni Joani hane ba buzizwe ka za ku folisa muuna wa fa munyako obizwa Bunde. Neba bulezzi kuli, “Neba lemuhile kuli,” baprisita bania neba lemuhile, “kuli neli litimbi mi ne li baana baba si ka ituta,” kono ba to lemuha kuli ne ba li ni Jesu. Kakuli, (kiñi?) ne ba eza lika ze swana za Na ezize.

<sup>94</sup> Ulukela kuba kwa musebezi wa Ndate. Mi kacenu i lukela kuba ze swana.

<sup>95</sup> Cwale, muhupule, Yena wa swana maabani, kacenu, ni kuyakuile; kakuli Mulimu u ki katanyeza ku Yena, kona sibaka fela sinosi se si li teni; kakuli sani kona Sa ketile kubeya Libizo la Hae, ku Jesu. “Jesu” kona Libizo la Mulimu. Muhipule, Ndate, Mwana, Moya o Kenile, ki malumbatina a Libizo la “Jesu Kreste.”

<sup>96</sup> Fani Mateu hana ize kuli, “Muye cwale, mulute macaba kaufela, mu ba kolobeze ka Libizo la Ndate, ni la Mwana, ni la Moya o Kenile.”

Mo se li tolokezwi musili kacenu, mi bali, “Ka libizo la Ndate, libizo la Mwana, libizo la Moya o Kenile.” Mane zeo ha li si ka ñolwa niheba ku ñolwa. Ki cwana, “Ka Libizo,” lililiñwi, “la Ndate, Mwana, Moya o Kenile.” *Ndate* ha ki libizo, *Mwana* ha ki libizo, *Moya o Kenile* ha ki libizo; ki lilumbatina.

Mazazi alishumi kasamulaho, Pitrosi a yema mi ali, “Mubake, mañi ni mañi wa mina, mi mu kolobezwe ka Libizo la Jesu Kreste.” Cwale kana na ezize sa Na mu bulelezi kueza? Na ezize sa Na sika mubulelela kueza. Libizo la Ndate, Mwana, ni Moya o Kenile ki “Mulena Jesu Kreste.” Mutu kaufela mwa Testamente ye Nca na kolobelizwe mwa Libizo la Mulena Jesu Kreste.

<sup>97</sup> Hakuna nihaiba mutu alimuñwi mwa Bibebe ya kile a kolobezwa ka malumbatina a Ndate, Mwana, Moya o Kenile. Zani ne li si ka taha kufitela tuto ya tumelo ya ba Nicaea ha i to beiwa kwa Nicaea, Rome. Neli mulao wa keleke ya Katolika, yene kalisizwe, ya paka taba yeswana, mwa katekisema. Ni na ni kona, yeo ki niti, *Bupaki Bwa Tumelo Yaluna*, ni zeñwi cwalo, yani kaniti ki tuto ya tumelo ya ba Katolika ya Roma. Baka mi bulelela kuli ha li yo mwa Bibebe; kono bali bana ni mata a ku cinca Manzwi ateni, haiba ba lakaza kueza cwalo, bakenisa pope. Na shutana.

Jesu Kreste ki ya swana maabani, kacenu, ni kuyakuile. “Mi yo kaufela ya ka zusa Linzwi leliñwi kuzwa mwa Bibebe,” kona mwa na bulelezi Jesu, “kamba ku beya linzwi ku Lona, siemba sa hae si ka zwiswa mwa Buka ya Bupilo.” Linzwi Lililiñwi; isiñi mubamba, kamba kalulo, ka Linzwi! “Yo kaufela ya ka zwisa Linzwi leliñwi . . .”

<sup>98</sup> Kwa simuluhu, Mulimu na file sicaba sa Hae Linzwi la Hae. Linzwi lililiñwi, ku lyanganisa, kona ze tisize lifu kaufela, butuku bwa pilu kaufela, kulobeha pilu kaufela. Eva, na si ka loba mubamba; na lobile Linzwi. Jesu ha ka taha mwahala Buka . . . Yani neli Buka ya pili.

Mi Jesu ha taha mwahala Buka, kisikamañi sa Na bulezi? “Ku ñozwi kuli mutu hana kupila buhobe feela, kono ni ka Linzwi kaufela le li zweelela mwa mulomo wa Mulimu.”

Mwa Buka ya mafelelezo, Sinulo kauhanyo ya 22, timana ya 18, sona siemba sa mafelelezo sa mwa Bibebe, Jesu wa bulela yena

Kasibili, kuli, "Ni paka kuli mutu kaufela ya ka zusa Linzwi leliñwi mwa Buka ye, kamba ku ekeza linzwi ku Yona, siemba sa hae si ka zuzwa mwa Buka ya Bupilo," kakuli ki mupolofita wa buhata mi u lyanganisize sicaba, mi mali a bona aka balelwa mwa lizoho la hae, ka kueza cwalo.

<sup>99</sup> Lu swanelu kulubula sibaka silisiñwi sa ku lapelela, sani ki kuli, Jesu Kreste yena Linzwi, wa swana maabani, kacenu, ni kuyakuile. Amen. Ku lukile. Muhupule, hakuna sibaka sesiñwi kwa ku kopanela mwa ku lapelela, isiñi sibaka. Mulimu na iketezi Sona.

<sup>100</sup> Joani, kwa mulaho koo ka linako za mwahala Testamente ye Nca ni ya Kale. Muteeleze hande cwale. Mulemuhe hande cwale. Joani, ona mbande yetuna yani, yene tile inze ifufa kuzwa mwa lihalaupa zazi leliñwi, mafufa ayona amatuna inza kwaluhile. Ne itukile fa likamba la Jordani, mupolofita mbande yetuna yene tamahanyize nzila mwahala Testamente ya Kale ni ye Nca, mi a ba biza kuzwa kwa silyo ni kwa nzohoto. Na biza lizazi la kubaka.

Hana tile kwa Mafarisi ni Masaduki; ki hali, "Musike mwa kala kubulela mwahala mina kuli, 'Luna ni Abrahama kuba ndata luna,' kakuli Ni mi bulelela nili Mulimu wa kona ku fetula macwe a kuba bana ba Abrahama." Oh, mawi!

Hana kalile ku hasa Evangeli ya hae, inza li, "Kuna ni Ya yemi mwahala mina, Yo mu sa zibi. Ha ni si ka Mu ziba kale, kono Ni ka Mu ziba Ha ka taha. Ha ni swaneli nihaiba ku tamulula likatulo za Hae. Kono Uka kolobeza ka Moya o Kenile ni ka Mulilo. Mi cekesi ya Hae imwa lizoho la Hae; Uka lukisa hande likatulo za Hae, mi Uka cisa muuku ka Mulilo o sa timi."

<sup>101</sup> Yona mbande yetuna ya Evangeli yani ne inzi fani, hane isweli ku sabisa cwalo. Mi ze masila za zwa, kamba Heroda, mibusisi ka nako yani, mupatalazi, na nyezi musala munyana hae. Mi kana mwa kona ku nahana kuli ona mbande yetuna ya Evangeli yani yali kuina fani ni kukuza fela ona cwalo?

Babañwi ba ku bona bali, "Kikuli ha u kutazi ka za linyalo ni telekano cwale, Joani, kakuli Heroda ku yani uinzi fani."

<sup>102</sup> Na ile fa pila hae ni ku yoli, "Ha ki mulao kuli ube ni yena." Luli!

Sikamañi, yena, neli sikamañi? Na li yena mbande yene zwa mwa lihalaupa. Na si ka lutiwa mwataswa lisabiso za mutu ni ze swenya, ni kopano yeñwi. Kono na lutilwe mwataswa mata a Mulimu Yamata kaufela, kuli azibe se ne si kaba teni. Na zibile sisupo sa Mesia.

Haleluya! Linzwi leo litalusa kuli, "Kulumbwe Mulimu wa luna!" Musike mwa saba. Hani si ka holofaza kale mutu fateni. Ha ni si ka tabela. Na ziba hande fo Ni inzi.

Oh, ha Ni nahana za hae, yona mbande yetuna yani ya fufa kwani ni kuinafafasi! Mi ali, “Ni ka Mu ziba Ha taha.”

<sup>103</sup> Zazi leliñwi na yemi fani, inza kutaza. Baprisita ne bali kwa neku leliñwi, bali, “U talusa ku ka taha nako fo litabelo za zazi ni zazi ha li ka tuheliwa; yona tempele tuna ye lu yahile ye, mi ni musebezi kaufela o lu ezize, luna kopano yetuna?”

Mi ali, “Ku ka taha nako fo zani kaufela ha li ka feliswa.”

“Ha ku konahali. Wena u mupolofita wa buhata!”

<sup>104</sup> Mi a talima kwa ni kwa. Mi ali, “Amubone, ki Yani fani! Ki sani sibaka se si ketilwe ki Mulimu sa kulapelela. Ki yani Ngunyana, yona Ngunyana ya niti ye takula sibi sa lifasi.” Na si ka bulela kuli, “Ki yo wa Methodist ya taha, ki yo wa Baptist ya taha, kamba wa Katolika.” Na ize kuli, “Ki yani Ngunyana ya Mulimu ye takula sibi sa lifasi.”

Ona sibaka sa masabelo sinosi se si liteni si fumaneha ku yena Ngunyana Mulimu yani. Ku Yena anosi kuna ni puluso; isiñi mwa keleke ifi kamba ifi, tuto ya tumelo ifi kaufela, sicaba sifi kaufela, ndate ufi kaufela, me ufi kaufela, mutu ya kenile ufi kaufela, kamba hakuna, sibaka se si kenile. Kono ki ku Mulimu ya Kenile, yena Mulena Jesu Kreste, koo Mulimu na beile Libizo la Hae ku Mutu, ka kuliululwa, Yena ya na lifile tifo ya luna baezalibi. Sani kona sibaka fela silinosi se si na ni piliso. Lani kona Licwe fo Ni yemi.

<sup>105</sup> Joani na Mu zibile. Na ize kuli, “Ne ni si ka Mu ziba nina hane Ni Mu boni ha taha, kono kwande kwani kone Ni amuhezi tuto ya ka . . .” Isiñi mwa mukopano wa za bulapeli inge bo ndatahe mo ne ba ezelize; isiñi inge murisita mwa na ezelize, mwa na lutezwi. Kono neli mwa lihalupa, mwa na inzi kwa sikolo sa lituto za bulapeli sa Mulimu Yamata kaufela, inza libelela Linzwi la Mulimu; isiñi ze ne bupabupilwe ki sikuwata sa baana, kono ki sa na bulezi Mulimu ka Sona. Mi cwale Joani ha talima mwahalimu abona Moya unzo shetumuka, mi ali, “Ni paka, kuli ki Yena.” Oh, mawi!

Ki sani sibaka sa mina sa ku lapelela mwateni. Ki sani sibaka sa mina sa kuipata ku sona. Ki yani Ngunyana ya Mulimu ye takula sibi sa lifasi. Hakuna nihaiba keleke, hakuna tuto ya litumelo, kamba sesiñwi fela, kono ki Ngunyana ya Mulimu ye takula sibi sa lifasi.

<sup>106</sup> Mwa bona Joani mwa na li tomezi? Na si ka bulela kuli, “Mina Bafarisi mu lukile, mina Basaduki, ba ha Heroda.” Na ize kuli, “Ki yani Ngunyana.” Sani kona sibaka. Una ni Libizo. Yani ki Yena. Hakuna libizo leliñwi mwataswa Lihalimu!

<sup>107</sup> Mutualime sa na bulezi Jesu ka za Joani cwale. Zazi leliñwi Joani ali ku Yena, ha bona sa Na eza. Jesu abuela ka yena, “Na li yena liseli lelituna leli benya,” ku ba bonisa nzila ye lukile ye ba lukela ku latelela fapila mutwaleti wa Hae, mutwalewi wa Hae

wa pili. Muteeleze hande. Musike mwa mbwinja seo. Jesu naize kuli, "Joani nali yena liseli lani." Malaki 3, hakuna mafosisa! Mupolofita ni liseli lelituna leli benya ne li tolokile Jesu kuli ki yena Anosi fela, "yena Ngunyana." Lingu zeñwi kaufela ze ne ba ambola fateni baprisita bani, ni lika zeñwi zani, neli bukuba. Fa ne kuna ni "Ngunyana!" Muuna yana nani liseli lelituna le li benya, yo Jesu na bulezi kuli neli yena.

Malaki 3 iize, "Ni ka luma numwana wa Ka fa Pila ka ku to lukisa nzila." Mi yena ya na lumilwe ku to lukisa nzila, na Mu pakile, kuba sibaka. "Yani ki Yena! Hakuna mafosisa. Yani ki Yena! Ni boni sisupo inge si Mu latelela. Ni ziba kuli Yani ki Yena; Liseli li zwile mwa Lihalimu mi la lula ku Yena." Ne ku zibahala, kuli yani neli Yena.

<sup>108</sup> Cwale, muzwale wa ka, Ni bata ku ku buza taba yeñwi, ka kukwala. Lu bulele cwana. Mwa Malaki 4, kana ha lu si ka sepiswa mbande yeñwi hape, yena ni Siita sa Mulilo inze si latelela, kubinisa keleke ye lyangani ya lizazi le kuli ki Yena Maheberu 13:8, "ya swana maabani, kacenu, ni kuyakuile"? Kikuli ha lu si ka sepiswa yomuñwi ya ka fufa kuzwa mwa lihalupa? Amen! Yeo kona Niti yetezi. Ki kuswanela cwani ni kuzamaelela ni Luka 17:30, koo Mwana mutu (Mbande) uka ipatulula Iliyena ku swabisa libaka zeñwi kaufela za kulapelela, ze cwale ka likopano ni zeñwi cwalo!

Mulimu na ketile sibaka sa Hae. Joani naize, "Ki Sani fani!"

<sup>109</sup> Mi cwale lu sejisizwe nto yeswana mwa lizazi le, Malaki 4, "Ku to fetula lipilu za bana kukutela," ku to bulela kuli Ha si ka shwa, lika ze ha ki za lusika lusili; kolobezo ka Libizo la Jesu ne isi ya ba kwa mulaho kwani, kono fa cwale Wa swana. Amen. Ku to swabisa libaka kaufela za ku lapelela, zani kona ze i ka eza mbande ya mafelelezo, ku bonisa kuli zeñwi ze siyezi kaufela ki bukuba, likopano ki bukuba, kono ku ba supezi hape ka sisupo se siswana sa Na ezize, kuli Wa swana maabani, kacenu, ni kuyakuile. Haleluya!

<sup>110</sup> Hape, mwa Sinulo 4:7, ne luna ni Libatana zene ze lu sa zo feza cwanoñu nyana fa.

Sa pili neli, lu fumani kuli...lu fumani kuli, neli tau. Sani ne sona Sibatana sa pili sene siilo kopana ni butata bwa lizazi lani, Tau ya Lusika lwa Juda.

Kasamulaho wa Yona kwataha Sibatana se si tatama. Mi lu fumana kuli, Sibatana se si tatama neli komu, ili folofolo ya milwalo, ya sitabelo. Mwa mazazi a sibaka sa milapelo ya Maroma, Keleke ya shwa; sitabelo.

Sene si tatami, neli mutu, neli Sibatana sa sifateho sa mutu. Mi mutu yani neli baongaongi ba evangeli, tuto ya mutu, tuto za bumulimu, ni zenwi cwalo.

Kono Sibatana sa mafelelezo sene si lukela kufufa, Sibatana sa mafelelezo se ne si na ni kutaha, Bibele ibulela kuli neli mbande yefufa. Haleluya! Mi mupolofita ali, mwa lizazi le, "Ku kaba Liseli." Oh, mawi! "Mwa lizazi lani kukaba Liseli"

<sup>111</sup> Se kubile lizazi la ba ongaongi. Se kubile lizazi le lili muluti fela, le li si ke kubizwa musihali kamba busihu. Kono mwa nako ya manzibwana, mwa nako ya Mbande:

Kukaba Liseli ka nako ya Mbande,  
Nzila yeisa kwa Kanya mu ka ifumana kaniti;  
Mwa nzila ya mezi kuna ni Liseli kacenu,  
Kupumbekwa mwa Libizo lelinde la Jesu.  
Banana ni babahulu, mubakele libi za mina  
kaufela,  
Moya o Kenile uka kena kumina kaniti;  
Kakuli Liseli la manzibwana li tile,  
Ki niti kuli Mulimu ni Kreste ki Alimuñwi.

<sup>112</sup> Amen! Kukaba Liseli ka nako ya manzibwana, sibaka se si ketilwe ki Mulimu sa kulapelela. Oh, ki sikamañi seo Liñusa litile ku lona, ki sikamañi sa Ka eza? Mi mwa lizazi la hae kukaba Liseli ka nako ya manzibwana, ni (sikamañi?) ku to amuhela bana ba Hae kukutela kwa Naha ya sepiso ya niti, ka sisupo se si swana sa Siita sa Mulilo sene si etelezi bana ba Isilaele mwahala lihalupa.

Sibaka se sikutelwe ki Mulimu sa kulapelela, Jesu Kreste. Kisona fela sibaka silinosi se siliteni. Lani kona Libizo fela la na ni Mulimu la puluso. Lani kona La beile mwa lubasi lwa mwa Lihalimu, ha lili mwa lifasi, lona la Jesu Kreste.

<sup>113</sup> O keleke, O sicaba, muezalibi mulikani, musike mwa sepa mwa nto ifi kaufela kwanda Jesu Kreste. Musike mwa sepa mukutazi ufi kaufela. Musike mwa sepa mutu ufi kaufela kuli aku pilise. Musike mwa sepa keleke ifi kaufela, tuto ya tumelo kaufela, kopano kaufela. Musepe fela ku Jesu Kreste, kakuli ki Yena Liseli la hola ye.

Halu inamiseni litoho za luna.

Kukaba Liseli ka nako ya manzibwana,  
Nzila yeisa kwa Kanya mu ka ifumana kaniti;  
Mwa nzila ya mezi kuna ni Liseli kacenu,  
Kupumbekwa mwa Libizo lelinde la Jesu.  
Banana ni babahulu, mubakele libi za mina  
kaufela,  
Moya o Kenile uka mi kolobeza kaniti;  
Kakuli Liseli la manzibwana li tile,  
Ki niti kuli Mulimu ni Kreste ki Alimuñwi.

<sup>114</sup> Oh, muzwale, kezeli, haiba ha mu si ka baka kale, haiba ha mu si ka kolobeza kale ka Libizo la Jesu Kreste, kikuli mu ka kala kueza cwalo busihu boo? Kana hamuna kufa Mulimu kolo ya ku mi amuhela mwa sibaka mo mu kona ku Mu lapela?

Muhupule, kwanda sani, hakuna sibaka ko Mulimu u sepisize ku mi katanyeza ni ku amuhela milapelo ya mina.

<sup>115</sup> Mu li, “Muzwale Branham, Ni lapela ka kusepahala fela!” Kona mwa na ezelize ni Kaine. Na ezize lika kaufela za mifuta ya sitabelo sa na ezize Abele, kono neli nubu ye fosahalile. Mwa kona kuya kwa keleke, ni kulifa za bulishumi za mina, ni kueza misebezi ya mina kakuba Mukreste mwa swanela kubela, ka kusepahala fela inge muuna kaufela kamba musali.

Ni yemi kwanu seli fa myaha ye mashumi amalalu, ona mwa muleneñi mo, ni kuhuwa ona Liñusa le liswana le. Ni se ni supala. Hanina kuba ni mina fa nako yetetele. Kono muhupele, mwa Lizazi la Katulo, linzwi la ka libeilwe fa matapa, mi li ka yo bulela ku mi lwanisa.

<sup>116</sup> Kuna ni fela sibaka silisiñwi ko Mulimu abeile Libizo la Hae, mi sani ha si yo mwa keleke, kono ki ku Jesu. Kuna ni sibaka silisiñwi fela sa kulapelela, kwanda sibaka silisiñwi fela kona mu kona ku amuhelwa, mi sani ki ku Mulatiwa, Jesu Kreste. “Hakuna libizo lisili mwatasa Lihalimu, leli filwe kwa batu, le lu kona ku piliswa ka lona,” hakuna keleke, hakuna tuto ya litumelo, hakuna sikamañi. Jesu Kreste!

Mi lani li swanela kuba Liñusa la hola ye, “Ku to kutisa lipilu za bana, kukutela kwa Tumelo yekile ya fiwa hañwi kwa balumeli.” Kana hamuna ku I amuhela busihu bo nji?

Mi cwale ha lu nze luinamisa litoho zaluna.

<sup>117</sup> Mi baba tabela ku hupulwa mwa tapelo, munanule fela mazoho a mina. Halukoni ku bizeza sicaba kwapili, kakuli ki babañata fela. Mulimu ami fuyole. Mawi! Kwa nzohoto ya ka, Ni sepa kuna ni baba eza mianda ye milalu.

<sup>118</sup> Cwale kwa neku la silyo sa ka, kikuli mu ka nanula mazoho a mina, muli, “Ni bata ku hupulwa.” Ni sepa kuna ni baba eza mwanda ni ni mashumi aketalizoho, kamba kufitelela, kwa silyo sa ka.

Luna ni tabernakele kwanu yena ni siliba sesituna kwanu; mulisana, mulisana yomunde, Muzwale Orman Neville, ni batusi, baana babali teni mo bo mubonanga ni ku kopana ni bona. Zazi ni zazi, busihu ni busihu, hola ni hola, batu baba bata ku kolobezwa, baba bakile, ba libelezi kamita. Mi ha mu utwela taelo yani, mwa ikolwisisa, ka sepiso ya Mulimu, haiba mu sephala mwa pilu ya mina, ku to amuhela kolobezo ya Moya o Kenile.

<sup>119</sup> Kuna ni fela sibaka silisiñwi sa kulapelela. Cwale, sani ha ki mwa tabernakele. Sani ki ku Kreste. Lu kena cwani ku Yena? “Ka Moya ulimuñwi luna kaufela lu kolobelizwe mwa Mubili ulimuñwi.”

Halu lapeleni.

<sup>120</sup> Mulimu Yomunde, sina mazoho aa a nanuhezi mwahalimu, ba bonisize se sili kwatasi lizoho lani mwa pilu, ili kuikolwisia kuli batokwa yezwelela ku Wena. Ni lapelela mañi ni mañi wa bona, Ndate. Mi Ni ka bulela ka swanelo Linzwi la Hao. U bulezi kuli, "Ya utwa Manzwi a Ka, mi alumela ku Ya Ni lumile, una ni Bupilo bo bu safeli, mi ha sana kutaha mwa Katulo; kono usilile kuzwa mwa lifu kokena mwa Bupilo."

Ndate, ka kuzwa fela mwa tolopo libiki nyana zefelile, hani kuta, na buza, "Ka taba ye?"

"Kiñi, ba icongile."

"Kihande, kucwani ka za . . ."

"Ba i congile."

<sup>121</sup> Mulimu Yomunde, lu bizwa alimuñwi ka alimuñwi, alimuñwi ka alimuñwi luna ni kulibana ni butata bwa ku zamaya mwa musindi wa muluti wa lifu. Mi ki swanelo ku mutu ni mutu wa luna, sina batu baba shwa. Kono, busihu bwa kacenu, U lufile zotokwa za Hao, kuli haiba lu ka lumela ku Yena ni ku kolobezwa ka Libizo la Hae, kuli U lu kenye mwahali. Mi cwale ni mwa Mubili wo, Mubili wa Kreste, isiñi mwa keleke; kono mwa Mubili wa Kreste, Mubili wani u so atuzwi kale. Hauna kutaha mwa Katulo. Mulimu na suluzi buhali bwa Hae fahalimwa mubili wani, mi mubili wani u lukuluuhile kwa sibi; mi, kakuba ku Yena, ulubeya baba lukuluuhile kwa sibi, ka Swaledo ya Hae yena ya na lu shwezi. Mi teñi mwani luna ni kutwano ku yomuñwi ni yomuñwi, foo Mali a Jesu Kreste, Mwana Mulimu, a lu kenisa kwa sibi kaufela ni kusilafala.

<sup>122</sup> Ndate, Mulimu, Ni lapela kuli Unge mañi ni mañi wa bona mwa Mubuso wa Hao. Lumeleza cwalo, Mulimu. Kusike kwa lateha nihaiba alimuñwi wa bona; kusike wakba mushimani kamba musizana, muuna kamba musali. Mulena, babañwi ba sicaba sa hesu bateni mo, busihu bwa kacenu cwana, babazwile mwataswa Mali ani. Mo Ni hupulela hande manzwi a bondate! Mi Na lapela, Mulimu Yomunde, kuli kutokwe ni yomukana wa bona ya ka lateha. Lumeleza cwalo, Mulena. Na Ku lumela cwale, ka seo kaufela Ni nani sa kulumela ka sona.

<sup>123</sup> Zamaya mwahala mizwale ba ka, likaizeli, balikani baka, ona mwa sibaka se busihu bwa kacenu ni kwabuse fa mawaile. Linaha zeñata nyana za teezeza, kukalela kwa Likamba la Upa koo kuissa kwa Wiko. Na lapela, Mulimu Yomunde, kuyo punya kafoo kwa mahalaupa a Tucson, ku yo li tii kwa California, kwani mwa Nevada ni Idaho, kafoo ni Upa ni libaka za fakaufi, mwani mwa Texas; ona pizo ye hanze ifiwa, sicaba siinzi mwa—mwa likeleke nyana, libaka za kunwiseza limota mafula, mandu, basweli kuteeleza. O Mulimu, mi cwale muuna ya latehile yani kamba musali, mushimani kamba musizana, ka hola ye, batahe ku Wena. Lumeleza cwalo ona fa. Lwa kupa ka Libizo la Jesu, kuli ba fumane sibaka sa buiketo se ha ku sana ni nako.

Mi, lu bona muñolo fa limota, lifasi liba le li ikalezwi, nako ya kuliululwa ifakaufi. Siemba sa naha ya luna sa tiba, kalulo yeñwi isweli ku pikuluha ni ku tibuka ka zikinyeho ya lifasi, sina Jesu mwa na sepiselize mo ne ku ka bela. Ku sike kwaba nako yetelele ku bona, Mulena. Haba amuhele cwale, kakuli lu ba tahisa ku Wena kakuba mipuzo ya mukopano, ya Evangeli, ka Libizo la Jesu. Amen.

<sup>124</sup> Kana mwa Mu lumela? Mulimu ami fuyole. Ki babakai baba lumela kuli yeo ki Niti, kwa nzohoto ya ka, mu nanule mazoho a mina. Ki babakai kwa silyo, mu nanule mazoho a mina. Mulimu ami fuyole. Kuya ka mo Ni bonela, mañi ni mañi. Yeo ki Niti, balikani. Mulimu uziba kuli yani ki niti.

<sup>125</sup> Cwale halunze luli ku Yena, ni kuba ku Yena, muna ni kuba ni lika kaufela za Na shwezi. Mi ki sikamañi sa Na shwezi? “Na holofalizwe ka libi bwa luna, na titikezwi bumaswe bwa luna; koto ye lufumani kozo ka yona ne iwezi Yena fahalimu, mi ka miupa ya Hae lu folisizwe.” Kikuli mwa lumela cwalo? Mwa lumela mwa swalelo ya Hae ka nako ye nji?

<sup>126</sup> Kana kuna ni ya kula mwahala luna? Haba nanule mazoho a bona, kwa silyo kamba nzohoto. Likwata zetuna za butuku. Hanikoni kubiza mukoloko. Mwa bona, Hani si ka . . . habakoni ku taha kwa katala. Hakuna mukwa wa kueza ka ona.

Bana ni mikopano ya litapelo mwa libaka zeñwi, za bakuli, mwa likeleke ni libaka zeñwi, kwani kwa tabernakele.

Ni ka mi buza nto yeñwi. Ki balumeli babakai ba baliteni? Mu nanule mazoho a mina. Ku lukile. Ni ka mi balela fela Linzwi, ili yena Kreste. Mulaezo wa mafelelezo a Jesu kwa lifasi, ni kwa Keleke, nitaluse, Na bulezzi kuli, “Lisupo ze li ka latelela baba lumela; ha ba ka beya mazoho a bona fa bakuli, ba ka foliswa.” Ki babakai baba ziba kuli yeo ki niti, Mareka 16, muli, “Amen.” [Puteho ili, “Amen.”—Mu.] Ku lukile. Ni kupa kuli kakuba mulumeli mubeya mazoho a mina ku yomuñwi yainzi kwa pata a mina. Mubeye fela mazoho a mina ku yali fa pata a mina, mi mutu ni mutu mu lapelele yomuñwi cwale. Mubeye mazoho a mina ku yainzi bukaufi ni mina.

<sup>127</sup> Mulena, fapila ka fa kuna ni ka putumende ka litaulo, tubyana nyana twa lika; me yomuñwi u lobezi fani, wa shwa, mbututu ya li bukaufi ni kushwa, batu babakula kai ni kai. Lu bala mwa Bibele kuli ne ba ngile masila ku Paulusi ni litino, mi ne ba abeya fa mibili ya bakuli; mi mioya yemaswe, ni mioya ye masila, ni matuku, ni makulano, na zwa mwahala sicaba. Cwale, Mulena, luziba kuli ha ki luna bo Mutoziwa Paulusi, kono lu ziba kuli Wena u sa li Jesu yaswana, yena Mulimu anosi na lukisize sibaka sa kulapelela. Mi cwale, kacenu, batu ba ba pakile tumelo yeswana, ni ku lumela sina mo ne ba ezelize batu bani. Kaniti U ba lukiselize kale nzila! Mi Ni beya mazoho a ka fa litaulo ze ni

kukupa kuli matuku ni kuimelwa lizwe mwa mibili ya sicaba ye ka beiwa ku bona ka Libizo la Jesu Kreste.

<sup>128</sup> Cwale, lu lutilwe, kuli Isilaele ha na zwa mwa Egepita, mwa kalulo ya musebezi, ne bali fa musipili wa bona kuya kwa naha ya sepiso. Liwate Lelifubelu ne li tibile mwa nzila ya bona. Mi Mulimu atalima kufitela mwa Siita sa Mulilo, mi liwate la saba, la kuta mwa mulaho, ni kutuhela Isilaele ku silela mwa naha ya sepiso. O Mulimu, talima kufitela mwa Mali a Jesu, busihu bo, mi ni butuku bu kutele mwa mulaho, mi Satani a lelekewa kwande. Mi ni sicaba si silele kwa sepiso yani ya buiketo bobunde ni mata, yana bulezi Mulimu kuli, “Fahalimwa lika kamukana, Ni bata kuli mube ni buiketo mwa mibili.”

<sup>129</sup> Cwale ha U nzo bona fani, Mulena Jesu, mazoho a sicaba se abeilwe ku yomuñwi ni yomuñwi, ba bonahalisa tumelo ya bona, kuli No bulezi kuli, “Lisupo ze lika latelela baba lumela.” Ba sweli ba lapela ka mukwa wa bona, ku yomuñwi ni yomuñwi. Mutu yatatama wa ba lapelela.

<sup>130</sup> Cwale, Mulena, butata bo bu talimilwe, kuli Satani, yena lihata lelituna, hana tukelo ya kuswala mwana Mulimu. Ki sibupiwa se si komilwe. Jesu Kreste, sona sibaka fela sa kulapelela, Libizo la niti fela linosi, na mu komile fa Kalvari. Mi lu kupa Mali a Hae ona fa cwale, kuli Na komile butuku kaufela, makulano kaufela.

Mi Ni biza Satani kuli azwe mwa sicaba se. Ka Libizo la Jesu Kreste, zwa mwa sicaba se, mi babe baba lukuluhile.

<sup>131</sup> Mutu kaufela ya amuhela foliso ya hae kuya ka mayemo a Linzwi leli ñozwi, mu bonise bupaki bwa seo ka kuyema ka mautu ni kubulela kuli, “Ni amuhela foliso ya ka cwale ka Libizo la Jesu Kreste.” A mu yeme.

Tumbo ifiwe ku Mulimu! Ki fo he cwale. Mu talime neku le, fa lihole ni lika zeñwi ze nanuha. Tumbo ifiwe ku Mulimu. Kona cwalo. Mulumele fela. Utensi mo. Haki bunde ni boo!

<sup>132</sup> Kwande mwahala sicaba, fa nde, kwa mihala, mulukela ku bona! Ni sepa mutu kaufela mwahali mo, kuya ka mo Ni zibela, kamba mane buñata bwa bona, ba yemi ka nako ye. Oh, ha ki nako yende cwani! Kubateni kwa Mulena, kona seo! “Fo kuinzi Kubateni kwa Mulena, kuna ni kutamuluha, kuna ni tukuluho.” Moya wa Mulimu wa lu lukulula.

<sup>133</sup> Cwale kakuli U lu folisize, lwa lumela cwalo. U lu pilisize; lwa lumela cwalo. Baba bata ku kolobeza, siliba si lukisizwe. Ka nako kaufela, hola kaufela ye mubata kutaha, kukaba yomuñwi kwani ya ka tokomela zeo.

Mi cwale Ni nahana kuli, lu si ka kwala kale, lu swanela kuopela pina ya kale ya keleke. “Na Mu lata, Na Mu lata kakuli Uni latile pili.” Mu nanule mazoho a mina ku Mulimu ni ku iopela ka lipilu za mina kaufela!

Lubata ku to kopana ni mina mo kakusasana, ka naini seti, ona muyaho oswana wo, kwa tuto ka za *Linyalo Ni Telekano*. Ku lukile.

Halu iopeleñi cwale hamoho.

Na Mu lata,

Nyangela tuna ye ha iopele cwalo cwale! Kwande kafoo fa mihala, mu i opele, ni mina.

Kakuli Uni latile  
Ni kuleka puluso yaka  
Fa Kalvari.

<sup>134</sup> Ne iezahalezi kai? Ka kota ya Kalvari. Halunze lu i opela hape, Ni bata kuli mulumelisane mwa mazoho ni yomuñwi yali bukaufi ni mina, muli, “Mulimu aku fuyole, muzamai.”

Na . . . ( . . . ? . . . )

Kakuli Uni latile . . .  
Ni kuleka puluso ya ka  
Fa . . .

<sup>135</sup> Oh, kikuli ha mu Mu lati? [Puteho ili, “Amen.”—Mu.] Ha Ki yomunde njí? [“Amen.”] Kana ki Yena Sibaka sa Maipato a mina? [“Amen.”] Ki yena Licwe mwa naha ye katezi, ki Mukunda mwa nako ya liñungwa, ona Sisabelo fela se Ni ziba. Kabakaleo:

Ni talima Wena,  
Ngunyana ya Kalvari,  
Mu Pulusi;  
U twa Na lapela,  
Zwisa sibi sa ka,  
Ku zwa kacenu  
Ni be wa Hao!

Halu nanuleñi mazoho aluna halunze lu i opela.

Ni talima Wena,  
Ngunyana ya Kalvari,  
Mu Pulusi;  
U twa Na lapela,  
Zwisa sibi sa ka,  
O ku zwa kacenu  
Ni be wa Hao!

Halu inamiseni litoho za luna cwale halunze lu ñuñuna cwalo.

Ha ni nze Ni pila,  
Mwa ha la maswabi,  
U Ni Zamaise;  
Fi fi be lizazi,  
Ta ku la miyoko,  
Si ke na latehela  
Kwa Hu le.

Ha munze mu inamisize litoho za mina, mulisana wa luna ya lateha, Muzwale Orman Neville, uka lukulula sicaba.



*SIBAKA SESIKETILWE KI MULIMU SA KULAPELELA* LOZ65-0220  
(God's Chosen Place Of Worship)

Liñusa le ka Muzwale William Marrion Branham ne li kutilizwe lwa pili mwa Sikuwa la Pelekelo manzibwana, Yowa 20, 1965, ili fa Parkview Junior High School mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)